


UTL AT DOWNSVIEW



D RANGE BAY SHLF POS ITEM C
39 10 10 01 06 010 3

M.C. 6/21/68


DR Sāmi, Ebū 's-Süreyyā
571 'Abdülhamīdīn kayğuları
.5
S34

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

2960

10/318



Digitized by the Internet Archive
in 2010 with funding from
University of Toronto

Sāmi, Ebū 's - Sūreyyā

ابوالتراب سامی

عبدالمجید کافولاری

'Abdūlhamīdīñ Kayğuları
[بیلام ایله جک خنده میدر،
کریه میدر ؟]

« سلطنت حمیر بنک بعضاً مهول آور ، بعضاً ضوک افزا ،
فقط لهبتت عمومیه سبله عبرت آمیز وقایع غریبه تاریخیه شیخا کبیر . »

مندرجات

- | | |
|--------------------------------|-----------------------------|
| ۱ — بر ایکی سوز | ۶ — صدر اعظم غائب اولمش ! |
| ۲ — علی سعوی آرائیوو ! | ۷ — کرد موسی بک نصل قاچدی ؟ |
| ۳ — مدحت پاشانک مملکتدن اخراجی | ۸ — " " " " ایکنجی قسم |
| ۴ — " " " " ایکنجی قسم | ۹ — غریب بر سوء قصد ! |
| ۵ — " " " " اوچنچی " | ۱۰ — یغما حسنک بوره کی ! |

اوقو ! هم اکلن ، هم عبرت آل !

توزیع محلی : جمعیت کتبخانه سیدر
« قدر » مطبعه سی

۱۳۳۰

DR

571

.5


S34

بر ایکی سوز

محترم قارئ! شوکتی او قورکن ماضی دوشون، استقبالی
اونوتمه، حاله منته نکران اول! ماضیسنی بیلمین ملت حالی
تأمین ایده میه جکی کبی ماضیدن عبرت چین اوله میانلرده استقبالده
هیچ بر ایش کوره مزملر .

بو کتاب ، آرتق ماضی یه قید ایدیلن عهد سیاهک بر قاچ
کیزی صحیفهسنی احتوا ایدیور . بن بو صحیفه لری جمع وتلفیق،
تحریر وتتمیل صورتیله وطنمه ، وطنداش لریمه خدمت ایتدم
ظننده بولنه رق سوینیورم . قارئلرمده مستفید اولورسه
بیم ایچون نه بختیارلق !

ابوالثریا سامی





علی سعاوی آرانپور!

۱

عبدالحمیدك اواسط سلطنتنده ایدی . برکون عتبه سمنیه
اصدقای بندکندن بری وساطتیه و «آزاد قبول ایتمز قولری فلان»
امضاسیله غایت مهم برژورنال تقدیمه یول بولندی . کناری
یاندیزی اوفاجق برعریضه لوق کاغد اوزرینه یازیلان برقاچ سطر
یازی ییلدیز سراینک آلتنی اوستنه کتیرمه کفایت ایتمش ایدی .
قرنادن ، خصوصی یاورلردن ، بندکان خاصه دن ، صدراعظم لردن ،
وکلادن ، تفکجی باشیلردن . خدمه قوماندانلردن طوتیکزده ،
بکجیلره ، قوشجیلره ، کیلارجیلره وارنجهیه قدر ولی نعمت
افدیبری طرفندن خاشلاشمش ، صداقتسزلکارندن ، غفلتلردن
سرسملکلردن بختله جمله سی آیری آیری تکدیر و تعذیر

ایدلمش ایدی . بتون بوبندکان بوکون غایت ، اوت غایت مهم
 بر خبر آلدیغنی حس ایدیورلر . فقط بو خبرک نه کبی برشی
 اولدیغنی کشف ایده میورلردی . یکر یکرندن صوروب آ کلامق
 ایسه اوزمانک ایجاباتنه هیچ ده توافق ایده مدیکندن بهوده کشفنه
 چالیشیورلردی . نهایت برتفنگیجی ارسالیله بشکطاش محافظی
 چوروملی حسن پاشا دعوت ایدلدی وسرایده هیچ کیمسه
 ایله کوروشمه سنه امکان قاله دن حضوره یالکزجه قبول ایدیلوب
 عین وجهله بشکطاش قره غولنه اعاده ایدلدی .

بومهم وتاریخی کونک کیجه سی بنده خاص واصدق شهریاری ،
 محافظ عالیتبار حسن پشای ذی وقار صرتنده برنفر البسه سی والنده
 قالین برصوبا اولدیغنی حالده بشکطاشدن اسکی پوسکی برقایغه را کبا
 یالکزجه اسکداره کچدی . وقت کیجه یاریسی اولدیغندن اسکله
 جوارنده بالطبع آرابه بوله مازدی . میخانه دو کونتیارینی بکله مک
 اوزره یالکز برکرا بارگیری صاحبیله برابر اسکله میداننده کی
 چشمه نک صاچاغنک آلتنده پنسکله یوردی . معظم حسن پاشا
 بو طالعزلکه آغز طولوسی برکفر صاوردقن صوکره
 بارگیری بی چاغیردی :

— پاشا قپوسنه کیدرمیسک ؟

دیدی . بارگیری کیجه آیا زینک تأثیر یله یکدیگرینه اورمقدمه

بولنان دیشلرینی صیرپته رق لاقید :

۵

— بابالق برچارىك ! ...

جوانى وىردى .

اويرلره ، كوكلره صيغاميان ، دنيانك آتلىنى آرابه لىنى ،
اوتوموبىللىرىنى ركوب دولته بردرلو لايق كوره مين حسن پاشا
حضرتلىرى ، ذليل و مسكين طوپال كرا باز كيرينه پك كوچاسكه
آتلايه رقى يوله روان اولدى .

اسكدار متصرفى سليمان پاشا كيجه يارسنه يقين بر زمانه قدر
مهام امور ضابطه ايله پك بمان اشتغال ايلد كدن صوكره بيتاب
خانه سنه دوشمش ، ايرتسى كون دخی آرزوى شاهانه نك نصل
انفاذ واجرا ايديله جكنى تخيل ايدى ايدى او يقويه ظالمش ،
كىتمش ايدى . بردن بره يتاق او طه سنك قپوسى اورولدى .
متصرف پاشا ذاتاً بوكي از عاجانه آليشقين اولديغندن قاريوله سنندن
قالقمغه لزوم كورمه دن :

— نه او ؟ نه اىستيور سگنز ؟

دييه سسلندى . كنديسنك او طه اوشاغى اولان كرد عبداه
بر معتاد او طه قپوسنى يارم آچارق باشنى اوزاندى و :
— افندم ، بر اخنيار عسكرك ، چابوق پاشا كاسين !
ديبور .

ديدى . متصرف پاشا اسنه يه رك صاغندن صولنه دوندى و :

— یارین پاشا قپوسنه کلسین ، نه افاده سی وارسه اوراده
ویرسین !

جوابی اعطا بیوردی . اوشاق کیندی ، ایکی دقیقه صوکره
تکرار کلدی . بودفعه پک تلاشلی ایدی :

— افندمز کلن آدم ، شی محافظ حسن
پاشا

جمله لرینی بتیرمکه وقت بولمه دن متصرف پاشا لاستیک طوپ
کبی رندن فیرلادی و اوشاغک صورتنه شویله جه باغیره رق کیجه لک
کورکنی انتاری اوزرینه ، فسنی ده باشنه کچیردی :

— أشک حریف ! مادام پاشا افندمز تشریف بیورمشلر ،
نه اچون اول آ کلایوبده خبر ویرمدک ؟

عبداحمدک بو ایکی بنده خاص قوناغک سلامق او طه سنده
قارشی قارشی یه کلدکری زمان پک دقتلی دقتلی بر لرینک کوزلرینه
باقدیلر . هر ایکسی بو باقی شلریله یکدیگریک کوزلرندن برشیلر
او قومق ایستورلردی . بو بر ثانیه لک تصادم انظاردن صوکره
متصرف پاشا حسن پاشا قره غولنه او عرادینی زمان یاپدینی کبی
حسن پاشا باباسنک قوشارق النی او پدکن صوکره قارشوسنده
آیاقده طوردی ونه اراده لری اولدینی حال و طور یله صوردی .
محافظ پاشا آرقه سنده کی نفر قاپوطنک ایلیکلرینی چوزره رک ،

فسنی ده بر آرز آرقه یه ایتهرك كندینه بروضع متعظمانه وپردكدن
صوكره نیم تبسمله مأموریتنی تبلیغ ایتدی :

— هایدی پاشا ! علی سعاوی بی آرایه جنز !

متصرف آرزدها حیرتندن اولدیفنی یره دوشه جكدی ...

علی سعاوی آرانه جق !

علی سعاوی بدایت جلوس هایونده، برخلع واجلاس قیامی
انساننده پارچه یارچه ایدلمش، جنازه سی تشهیر اولمش، بوکون
کمیکلرندن بیاه اثر قلامش بر آدم ایدی . حتی ... حتی اونی
قتل وافنایدن واریار لرغیله بین الامائل تمایز ایدرك پادشاه زمان
نزدنده بیوك بر موقع اعتماد واعتبار قازانان ذات شمدی اونی
آرامغه مأمور آقارشوسنده بولنیوردی ... حیرت اندر حیرت!
مع مافیه محافظ پاشا حضرتلری پكده اویله شقا کوتورور
طاقدن اولدیفندن ایشی لطیفه یه بوزوب کنه مسئله بی آکلامقده
ممکن دکل ایدی. پادشاه علی سعاوینك آرانسنی فرمان بیورمش،
حاجی حسن پاشا حضرتلری ده آرامغه چیقمش بونلرك
هپسی عین کرامت، عین اصابت ایشلر ! ... هیچ اعتراض
کوتورور یری یوق !

متصرف درون دلدن بر : « عقم سکا امانت، یارب ! »
دیدكدن صوكره بروضع متواضعانه ایله محافظ پاشادن استیدانه
جرأت ایتدی :

— علی سعاوی می ؟ زرده آرایه جغز ؟

— اوت، علی سعاوی! اسکله جوارنده کی عوام قهوه لرنده
 آرایه جغز! حلالری، قایقجیلری، بارکیرجیلری، آرایه جیلری
 قاندروب ولی نعمت افندمنز عایینه برقیام تربیی ایچون کلش!
 — زردهن کلش ؟

— نه بیله یم بن، جهنمدن اوله جق!

— افندمنز، اوشقین بالذات اتلاف بیورمدیکزمی ایدی؟
 — اوت، بالذات، هم ده بومبارک صویا ایله اولدیرمش ایدم!
 — فقط

— فقط . مقطی یوق! افندمنز بویله فرمان بیوردیلر .

مطلق بولنه جق . هایدی چابوق کین، اسکله یه اینهلم!

زوالی متصرف آرتق بو صداقت مجسمه نك قارشیدنده لام
 جیم دیمه نك پك بیوده وعادتا تهله کله اوله جقنی ذکای فطریسی
 ایله آکلایه رق همان البسه اوطه سنه قوشدی. زردیه کیده جکنی
 استفسار یوللو یوزینه دیک دیک باتان اوطه اوشاغی کرد عبدالله:
 — عبده! بز تکرار کلنجه یه قدر آشاغیکی مسافرا ایچون

برطوربا آرپه، صمان حاضرله!

دیدى. متصرف اساساً بوکبی نکته لی سوزلر صرفنده مشهور
 اولدیغندن وکندیسنی یقیندن طانیانار اونك نکته لرینك معنای

ضمینلرینی پك كوزل آكلادقلرندن اوڤه اوشاغیده افندیك
نه ديمك ایسته ديكنی تفهمده کجیکمدی ، جواباً صوردی :

— افندم ، یولارده حاضر لایه می ؟

— ایسته مز ! اونك یولاری افندیسنه باغلی !

*
*
*

برچاریک ساعت سوکره چغنته پاشلار کوزل برقوناق آرابه سنك
یا صدقلرینه انکا ایتمکده اولدقلری حالده اسکدار اسکله سی جوارنده
تنها بر سوقاغه مواصلت ایدرک اوراده آرابه دن ایندیلو ویواش
ویواش ایچلرنده بر راداره قندیلی قدر کورلامبه لر یانان حمالار
قهوه لرینی ایسلی ، سیسلی جاملرینك طیشاریلرندن تفحصه ،
تجسسسه باشلادیلر . آریورلر ، آریورلردی . فقط بر درلو
بولامیورلر ، علی سعاوی بی آله کچیره میورلردی . قهوه لر طولاشلقدن
صوکره پولیس قره غوللری ده یکان یکان یوقلانندی و هر قره غولک
دائرة مأموریتنده علی سعاوینك شخصنه بکزر مشبوه الحال
برکیمسه بولنوب بولمندینی — صورت مخرمانده — قومیسرلردن
صورولدی . بالطبع هر قره غولدن آلدقلری جواب شو صورتله
وعین مآلده ایدی :

— افندم ، کمنی ؟ اویله بر آدم دائرة مزداخلنده کزه بیلمیری ؟

محافظ پاشا دوشکون ، بیتاب ، متصرف پاشا مستهزی
برخندان همان صباحه یقین بر ساعتده پاشا قپوسنه عودت ایتدیله .

محافظ پاشا-انك بالطبع اويغو عقلنه كيبوردى . فقط متصرف
 بوولى نعمت بنده خاصك بر آن اول اسكداردن اوزاقلاشمسنى
 تنى ايديبوردى . متصرفلق مقامندهكى كنىش قولتوقلردن برينه
 ياصلاندون صوكرامحافظ پاشا متصرفه ديدى كه :

— شمدي ياز باقلم !

— پاشام ، نه يازه يم ؟

— بر عريضه . . .

— نه كبي ؟

— على سعاوى نى آرايوب بوله مديغمزى افندمزه عرض

ايده جك بر كاغدا . . .

متصرف ماصه نك كوزندن بر عريضه لك چكوب خط

دست كريميله بر ايكي سطر قاره لادى . بيتيردكن صوكره

امضالامق ايچون حسن پاشايه تقديم ايتدى . پاشا حضر تلى

كالم عظمتله :

— سن امضاله !

ديدى . متصرف او آنده بر وضع اديبانه آلهرق :

— آمان افندم ، كوله كزى تكدير بيوريورسكز . . .

هيچ افندمرك حضوريله كوريلن بر ايش حفته قولكز

نصل امضا آتمغه جسارت ايدر ، افندمزه قارشى بويله بر

كستاخلى ارتكاب ايدر مى يم ظن ايديبورسكز ؟

دیسیلہ بوجملہ بندکانہ محافظ پاشانک آیرانغنی دہا زیادہ
شیرہ رک خوشلانندیغنی ایما ایدر بر طورلہ شویله دیدی :

— سلیمان ! نه قدر ایش بیلیر آدمسک !

امضا یرینه بر ۸ برده ۷ یاوبده اوزرینه بر چیزکی چکیویر ،
نم امضام اولور ، اویلهده تقدیم ایدرز .

متصرف بومسریده بلا افاتہ زمان انفاذ ایلدکن صوکره
اوافق بر قهوه آلتی ایتدیلر وهمان حضور هایونه چیقارق
نتیجہ تحریاتی عرض ایتک اوزره بیلدیزه متوجهاً یوله چیمقدیلر .
اسکدار اسکلهسنه کلدکلی وقت صباح اذانی او قونویوردی .

*

یکرمی درت ساعتدر کوزینه اویقو کیرمه مش ، بومدنتک
بوتون دقیقه لرینی تر تر تینمکله کچیرمش اولان خاقان محاورع محافظله
متصرفک حضور طلبارینی خبر آلتجه همان کتیرملارینی ، فقط
محافظ اول کیرمک شرطیله برر بر اداخل ایلمدینی امرایتدی .
محافظ بر توکل دیندارانه وخضوع عبودیتندانه ایله داخل حضور
مفیض النور حضرت ولی النعمی (۱) اوله رق راپورینی عرض
ایتدکن - کندی قولنجه - نائل التفات اعلی الدرجات کیتی ستانی
اولدکن صوکره متصرفه کلش ، اوده بر عتاد بیلدیزک
ایچ طرفنده کی بر چوق اسرار انکیز یولاردن ، قوریدورلردن
کچیریلرک آغاجلر اورته سنده کی بر کوشکده ویتاق او طه سنده

حضور هایبونه قبول بیورلش ایدی . سلیمان پاشا ایفای مراسم
تعظیم سازی و دامن بوسی ایلدکن سوکره صوربله جق سؤالره
جواب ویرمک اوزره توقف ایتدی . عبدالحمید قاریوله سنک
یاننده آیاقده طورییوردی . قالین و کور سیمیله پاشایه
صوردی :

— سنده برابر آرادگی :

— اوت افندمز !

— نه بی آرادیکز ؟

— ولی نعمتمک اراده سنک انفاذینی !

— شیطانسین !

— آزاد قبول ایتمز قولیکزم !

— حسن پاشا حیوانسک کمدی اولدیردیکنی ادعا ایتدیکی

حریفی آرامسنه سنده شاشدکمی ؟

— افندمزک اراده سی عین اصابتدر !

— سنده بیلیرسک یا ! بو آدم تام ایستدیکم در دکلی ؟

— قلب هایبونلری مهبط الهام خدادر .

ایرتسی کون حسن پاشا قره غولنک محتشم محافظلق او طه سنک

کوشه سنده معلق و علی سعویسک قاتلی اولان عصای شریف (؟)

بتون ارکان حکومت و بندکان خاصه طرفندن بر معتاد زیارت

وتلثیم اولنیوردی ! . .





مدحت پاشا

نك مملكتدن اخراجى

۲

[برنجى قسم]

او زمانك خاطرۀ مؤلمه سنى هنوز دماغلر نده طاشيمه سيلنلرجه
مجهول اولمدينى اوزره عبدالحميد خانك اوائل سلطنتى دائمى بر
وكللا فورطنه سى ايچنده كچيور، برى ديكرينك موقعنى قاعقى،
اوتنه كى بريكندن دها يوكسك برپايه ايريشمك ايچون پادشاه
نوجاهك تجربه سزلكنندن، على الخصوص وهمندن استفاده ده
هيچ بر فرصت قاچيرلميوردى. بوانشاده بتون وكلانك كوزينه
باتان، بتون بوانتريقه لره سد سديد اولان مدحت پاشا ايندى.
وزير مشاراليه مملكتك اداره سزلك يوزندن اوغرا ديفنى

واو غمراه جنى فلاكتلىرى پك اى كورسيور ، بيلبور ، عين
 زمانده اوكتى آلهجق صورتده پادشاهى اداره يه چاليشيوردى .
 فقط ... آه ، هر زمانده ، هر عصرده اولديغى كې او وقتده
 دخى صرف منفعت و اعراض شخصيه لرينك حصولى ايچون
 ايجاب ايدرسه قوجه عثمانلى يوردىنى برتكه اوده چكته يوب
 كچه جك ادانى اكسيك اولمديغندن قوجه وزبرك بتون پلانلرى ،
 بتون محصول مساعيسى ايكي قوتلى كېله ، محرك او هام ايكي
 ژورنال ايله محو وازاله ايدىلور . بونكله ده اكتفا اولميه رق
 پاشانك افناى وجوديله تشفى صدر ايدلك ايسته نيلىوردى . بر كوچك
 كتابك ايچنه بتون تفصيلات لازمه يى درج ايتك امكانى اولمديغندن
 بالمجبوريه بزده الزام اختصار ايله اوزمان مدحت پاشا عليه
 بين الوكلا و الرجال چوريلان فرلدا قرك قيد و نشرينى مورخ لرمزك
 عهدۀ حميت وغيرتارينه تحمیل ايدمك ، ايشك اك روحلى
 قسمنى يازم جغز .

« ... ۱۲۹ سنه مالىه سى اواسطنده ايدى . سرعسكرلك
 مقامنده بولنان پاشا ايله ضبطيه ناظرينك و وكلا دن حريص جاه
 ديكر بردانك ترتيباتيله رضانا منده بر دنيه ولى نعمت افنديلرينه
 تقديم ايدلك اوزره بر ژورنال ترتيب و تحرير ايتديرلدى .
 بو ژورنال شو مألده ايدى :

« عصر عبد العزيز خانى ده و جلوس هايون مسعدت مانوس

حضرت ولی نعمت بیعت اعظمیلرندن بوکونه قدر کچن زمانده کی طور وحر کتندن ده استدلال بی-وریله جنی اوزره قوانین موجوده و صورت اداره حاضره ایله بممکتک تمامیت وسلامتی تأمین ایدیله میه چکی ظن جاهلانہ وزعم فاسدانه سنده بولنان مرتد (مدحت) پاشانک وزرای عظامکزدن (....) و (....) و علمای اعلامدن (....) و (....) ذاتلرله بالاتحاد خدانکرده مقام سلطنت و خلافتی الغا وریاسته بین الجمهور بر تورودی کتیرلک اوزره اصول اداره حکومتی جمهوریتہ قلب و تحویلی قرارلشدیردیغنی و بوامنیة ثنیانہ نک حیز آرای حصول اوله بیلمسی ایچون دربار شوکت قراره یونلر نده خلیجہ واسع ترتیبات اجرا قلمش اولدیغنی حسب الصدقه عتبہ طوبی مرتبہ شهر یاریلرینه عرض ایلمر ، تفصیلات مقتضیه نی حاوی راپوری ده مطویاً تقدیمه جرات ایلمر ، اولبابده و قاطبہ احوالده»

مطویاً تقدیم ایدیلن راپورک غایت مفصل ، غایت اوسته لقلی یازلمش اوله جننی تمهیده حاجت یوقدر ظن ایدرم . خاقان سابق بوژورنال ایله راپوری آلیر آلماز . بندکان خاصه سنی حضورینه جلب ایله بو بابده کی فکر لرینی ، وقوف لرینی - فقط ژورنالی و راپوری ارائه ایتمکسزین صورتی و مدحت پاشانک طور وحر کتندن نه استدلال ایلدکلرینک ده آچیقجه سویلنمسنی فرمان بیوردی . بالطبع هر قفادن برسس چیقدی . کیمی مدحت

پاشانك كار كذار ، تجربه كار بروزير پرتديبر اولديغنى ، كيمي
 آتوب طوتمقده ماھر ايسا ده ايش باشنه كچنجه هيچ برشي
 ياپه ميه جق قدر سساده بر آدم بولنديغنى ، بعضيسي پك ذكي ،
 پك دراييتي ، على الخصوص اوروپايلير جه پك ابي طانمش اولديغندن
 حسن اداره ايدلمسنى ، بعضيسي ده مملكتي اوروپايلاشدير مق
 املنده بولنديغنى جيهتله عنعنه وفضائل مليه يي محافظه ايچون
 كنديسنك قطعياً سركاره كتي رله مسى لزومنى ، دها ايشكذار ،
 ده اصادق (!) برايكي ذات ده اوتانمندن هيئت عموميه سى اعتباريله
 مدحت پاشانك شوكتساب افنديليري ايچون تهلكه لى بروجود
 ايدوكتي بيان و فقط نتيجه ده جمله سى بردن ولى نعمت بيمتاري
 جمله دن زياده واقف هر حال اولديغندن بوبابده هر هانكي صورت
 ترويچ و تنسيب بيوريلورسه كرامت و اصابت آنده اوله جغنى
 سرد و اتيان ايلديلر . بوجمعيه عقلايه اذن و رخصت و يريابوده
 حضوردن چيقدقلى صره ده بعضري تند چهره ، ترش رو
 ايله تعقيب ايدلمش ، بعضري ده فوق العاده التفات جهاندرجات
 شهياري به مظهر اولمش ايدى . بالطبع استشقال ايديلنلر مدحت
 پاشا لهنده اداره كلام ايدن حيمتمندان ، التفات كورنلرده دشمن
 حریت و سمليت اولانلر ايدى .

پادشاه زمان طوپلايوب طاغنديغنى بورجال عصر ك مفارقتنى

متعاقب قرناسدنك زياده سوديكي (....) [۱] بكي نزيديه جلب
ايله ژورنال وراپور مالندن ورجال دولتک بيانات وافيکارندن
بجمله مدحت پاشا حقه نه، معامله ايدلسي لازم کله چکني اوندرده
صوردی . بوذات عبدالحميدک توجهني جلب ايتمش ، اوکا عاداتا
مستشارلق ايتمکده بولنمش اولديني حالده مدحت پاشانکده اسير
فضائلی ، مقتون معاليسي ایدی . زواللی مدت عمرنده بو قدر
مشکل بر موقعه قالماش ایدی . پادشاهنک استفسار مهمنه
جواب ويرمک ايجون صيقلدی . مع مافيه دیدی که :

— افندمن قولکوزک فیکرجه قاليرسه ، بتون بو اسناداتی ،
چاغيروب بالذات کنديسنه سويله ملی ، جوانی ده اوندن آلملیدر
قولکوز اويله ظن ، حتی امید ایدیورم که مدحت پاشا بنده گز
بو اسناداتی کمال شدته رده ایده چک ، برقوری افترا اولدیني
حضوریکزده اثبات ايليه چکدر .

عبدالحميد ، بوجوابه قارشى پيدا ایلدیکی اغبراری زورله
ضبطه چالیشه رق شویله بیوردی :

— صاقین ، سنده اونک نعمت دیده لرندن اولمیه سک ؟
زواللی مابینچی اولوم ترلری دوکهرک شو جوانی ویردی :
— قولکوزک فیکرجه افندیسی ايله قولنک آره سنه یانچی
کیمسه کیرمه ملیدر ... چونکه

[۱] بوذات چوقدن رحمت حقه واصل اولمشدر .

آدمجفز معروضاتی تمام لایہ مہدی . خاقان زمان طوپ کبی
 کورلہ یہرک اوٹھ بی ، حتی مابین دائرہ سنی صارصدی :
 — اوت ، آرہ مزہ کیمسہ کیرمہ ملی دہ اودہ ایستہ دیکی
 کبی اویناملی ، اویلہ می ؟ بدلا!... مملکت بر آدملہ ادارہ ایدلز ...
 — فقط ، افندمز

— مدحت پشایہ اولان حسن ظنکیزک بودرجه سی کافی! ..
 — افندمز

— کافی دیورم !

مابینجی بک حمیت ودرایتک مکفاتی حضور هایوندن کمال
 غضبلہ قوغولتی صورتیلہ آلدقن صوکرہ مکفاته علی الکفاته اولوق
 اوزده بر اراده سنیہ ایله خانہ سنندہ اقامتہ مجبور ایدلدی .

*
 **

بوملاقات خص-وصیہ دن صوکرہ مدحت پاشا علیہ دارلری
 آرتق کھی آزی یہ آملشر ، هر فرصتدن ، هر وسیلہ دن بالاستفاده
 اوقیمتدار وجود حقندہ طعن و تشنیعہ باشلامشر ایدی . پاشا
 اطرافندہ دونن اهانت دولابلرینی ، دنائت انتریقہ لرینی پک اعلا
 بیلمکله برابر مسلکندن ذرتما انحراف ایتیمہرک چالیشیور ،
 پادشاهی طریق حق و صوابہ ارجاع ایچون صرف ما حصل غیرت
 ایدیوردی .

مشارالیه برکون لاجل المصاحه سرای هایونہ کیدرک مابینجی

(. . .) بلك دوچار غضب شهريارى اولديغنى بالتصاف اوكرنش ، بيان حيرت ايتمكزن - سببى بيلمديكى حالده - كندىنى آلهامش ايدى . بو اوفاجق حادثهده تلغراف سرعتهه عبدالمحميده يتشديرلدى . پاشا سرايده بولمىسندن بالاستفاده حضوره جلب ايدلدى . شجاعت و مردانكى اك ممتاز خصائلندن اولان مدحت پاشا داخل حضور اولونجه پادشاه كنديسنه اوطورمسنى امر ايدى . پاشا بوامره اطاعت ايدهجكى رده كمال تواضعله ايفاي راسمه تمنا ايله ديدى كه :

— شهريارم ! رجال دولتك حضور شاهانهده قعود مجبوريتارى تاريخ عثمانيده پك نادر واقع اولمشدر . امر وفرمانكزى قائماً تلتى ايتمك بندكان ايجون دهازياده موافق دأب عبوديتدر .

مدحت پاشانك بوسوزلرى سويلمكدن مقصدى يكي تورهين بر طاقم ظيب چيقدى بندكانك كرك كنديسنى ، كرك سائر اعظم رجالى كوزدن دوشورمك ايجون زورنال تقديمي بهانهسيلاه حضوره كيردكلى صرهده فوق اللزوم مظهر التفات اولمريتك پكده ابي برشى اولمديغنى شهريار عصره آكلاتمق ايدى . پادشاه ايسه پاشانك مقصدىنى آكلامقده كيكيمهرك جواب ويردى :

— مملکتده تأسیس مساوات ایتمک ایسته‌ین حکمدار ،
بویله اسکی عادتله پکده مراعاته احتیاج کورمز .

— پادشاهم! حکمدار ایله افراد آره‌سنده هیچ برعصرده
مساوات اوله‌ماز و اولمالیدر. چونکه اوتقیدرده نظام عالممختل
اولور!

عیدالحمید صیقلدی. زیرا مدحت پاشایی نصیحت آلمق ایچون
جلب ایتمه‌مش ایدی. بر سیغاره یاقدی ، اوکنده کی ماصه‌نک
اوزرنده بولنان کانغدرلی قاریشدردی بویله‌جه برایکی
دقیقه کچدی ، پاشا آیقده بکله یوردی . نه‌سویله‌جکنی فکراً
ایجه قرارلشدیردقدن سوکره پاشایه توجیه خطابله :

— پاشا! اصول اداره حاضره‌نک تأمین سلامت مملکت
ایده‌میه‌جکی فکرنده بولندیفکی سویلیورلر، طوغریمیدر؟ دیدی.
— اوت، پادشاهم! مملکت جدا محتاج اصلاحدر ، قوانین
موجوده غیر کافیدر .

— پک اعلام، ینه‌سزک تنسیبکزه اعلان مشروطیت ایلدک.
قانون اساسینک ضامن سلامت اولدیغنی ادعا ایدنلرک برنجیسی
سزسکز.

— اوت تاجدارم ، ینه تکرار ایدیورم که اویله‌در فقط
قوانین نقطه‌سی نقطه‌سنه تطبیق ایلمک شرطیله

— ايشته تطبيق اولنيوريا!

— پادشاهم، سزی آلداتیورلر. . . .

مدحت پاشا بوجمله ایله عبدالحمیدک کندیسی حقنده ویره جی
حکمک اعلامنی آمش اولدی .

— کیم، آلداتیور؟

— اونی افندمز، قولکزدن ای فارقدرلر

— سویلیکز، کیم آلداتیور؟

— بنده کز زورنالجلیق یاپه مام!

عبدالحمید اوطوردینی قولتوقدن فیولادی، آیانغه قالدهرق
مدحت پاشابه طوغری ایکی آدیم یورودی وبر دقت مخصوصه
ایله کوزلرینک ایچنه باقهرق شوسوزلری سویادی :

— حقاری وار ایش، سز محتاج استراحت ایمشکز!

بیوریکز!

مدحت پاشا حضورهایونده خائب وخاسر چیهوبده باش
مایدیچینک اوطهسنه عودتله بر قولتوغه یرلشدیکی زمان « محتاج
استراحت ایمشکز » تعیرینک معناسی دوشونمکه باشلادی
پادشاهک جلو سندن او کونه قدر جریان ایدن سرای وقایعی
آره سنده بویله بروقه هنوز کچمه مش، یکی پادشاهک مسلك
ومشربی اوزمان پکده ای آ کلاشیه مامش اولدیغندن بودایه

سیاست بیهوده اوجههنگ نه دیمک اولدیغنی دوشونوردی . بر مدت دوشوندکدن صوکره بر سیغاره ، برده قهوه ایچوب اقامتگاهنه کیتمهکه حاضرلاندیغنی صروده قراندن برذات ایجری کیروب کندیسنه : « پادشاهک مسافری اوله رق سرای هایونده قاله جنی ، احتیاجات ضروریه سی ایچون نه آرزو ایدرسه اسعاف اولنه جنی مقتضای اراده الهام عاده (؟) شهریا ایدن» بولندیغنی تبلیغ ایلدی .

مدحت پاشا کندیسنک نزاکتله توقیف ایدلیکنی اکلادی وکال منانت وصالیتله محبوسیتنی کندیسنه تبلیغ ایدن مابینجی به دیدکه :

— پادشاهمزک اراده لری بالطبع مطاعدر . فقط بن کندیسنک بر طاقم اداینک آلت غرضی اولوب تاریخ ملیمزده لکه لی بر صحیفه وجوده کتیره بیله جک مسلکده دوام ایتمه سی ایچون بو محبس فلاکتده بیله چالیشه جنم . بویله جه عرض و ابلاغ ایدیکز ! قرین بک افندی ، بالطبع بونی ده یتشدرمک ایچون سرعتله پاشایی براقه رق چیقدی . براز صوکرده ایزباندود آسا بر تفنکچی کله رک مدحت پاشایی طیشاری به دعوت ایتدی و برابر آله رق مابین دائره سندن چیقاردی . پاشا بیلدیز باغچه سنک ییلانقاوی یوللرندن کچیریله رک کوشکلردن برینه ایصال واوراده اوزرندن قپولر قپانه رق یالکزجه ترک ایدلدی .

عین زمانده اوزمانک ضابطیه ناظری محرم بعض ارادات
 تلقیسی ایچون حضور شاهانه به کیرمش، قپالی و مهرلی برطرف
 دروننه موضوع تعایاتنامه بی حامله معززا و مظفر آزد شهر یاریدن
 چیقمش ایدی .



[ایکنجی قسم]

فداکار ملت مدحت پاشانک سرای هایونده مسافرتنک
 (؟) اوچنچی کونی کرک سرایده، کرک بحریه وضبطیه نظارتارنده
 فوق العاده حرکات کوریلپوردی. یاورلر، قرین بکلر، تفنکچیلر،
 سلاحشورلر بر طرفدن حامل اولدقلری ارادات سنیهی بحریه
 وضبطیه نظارتارینه ایصال ایچون یکندیکیلرله مسابقه ایدیورلر،
 دیگر طرفدن اوزالردن آلدقلری اجرات راپورلرینی، معروضات
 خصوصیه و رسمیهی سرایه کوتورپیورلردی. سرایک، بوایکی
 نظارتک اوکونکی حالنی کورنلر مطلقاً پک مهم بر حادثه
 اجتماعیه وقوع بوله جغنی، یاخود غایت مهم بر اختلال باعدیریلرله جغنی
 ظن و تخمین ایدرلردی. ییلدیز ایله قاسم پاشا و بنه ییلدیز ایله
 جمال اوغلی آره سنده کی قالدیر مار، شوسه لر یاورانک، بندکان
 خاصه نک آت نعلار یله آشندیریلپور، بر تلاش و خلجان قوشان
 دکل، عادتاً اوچان بار کیرلرک آیاقلرندن چیقان شراره لر مملکتده
 بر آتش اویونی اوینا مقده اولدینی ظنی حاصل ایدیورلردی.
 اوت، حقیقه بر آتش اویونی اجرا ایدیورلردی. فقط

بو او یونده یانان ، عادی بر بنا ، بر خانه دکل ایدی ، ملنک
 حریتی ، سعادتی ، دهاواضح تعبیر ایله وارانی ، موجودیتی ایدی .
 بو اوزون کون اقسامه قدر بو صورتله مرور ایتدی .
 غروبی متعاقب ضبطیه ناظری اخص بندکان شهر یاریدن (. . .)
 پاشا کر دونه مدبده ایله ویلیدیرم سرعته مابین هایونه کیدرک
 او کیجه کوربله جک ایشله داتر تعلیمات خفیه آلمش وعین سرعتله
 داتر سنه دوغوش ایدی . ناظر پاشا ضبطیه داتر سنه واصل اولور
 اولماز ارکان انظار تدن و ضبطیه میر آیلار ندن بحری بکی ایستدی .
 بک حضور نظارتیناهی به چیقارق عسکر چه بر تمنا ایله امر تله یسنه
 منتظر اولدینی صرده ناظر پاشا شمدی به قدر هیج کورولین
 بر حلم ، بر نزاکت او ائنده ارئه آثار ایلوردی . قارشیدسنده
 میر آلیک منتظر بولندیغنی کورنجه آیغه قالدق ورق یانته یاقلاشدی
 و بر ایله ستره سنک ایچ جیبندن چیقاردینی اوستی و ملی و قپالی
 بر ظرفی بکه اوزاتوب ، دیکر آلی ده او موزینه قویدقن صوکره
 شویله جه مختصر بر تعلیمات وردی :

— بحری بک ! بو کون سکا شوکتماب افدمز غایت مهم
 بر مأموریت تفویض بیوردیلر اگر بو مأموریتی حسن
 ایفا ایده بیلیرسه ک ترجهات پادشاهی به مظهریتک محققدر .
 — پاشا افدمز بک اعلا بیلیر لکه نم کبی بر عسکر دائم
 وظیفه سنی حسن ایفای دوشونور .

— بنده بونی بیلدیکم ایچون بو مأموریت مهمه نك سزه
تودیعی لزومنی شوکتلی افندمزه عرض ایتدم، اونارده تصویب
بیوردیلر .

میرالای پرخلجان بومأموریت مهمه نك نه کبی برشی اوله-
جغنی دوشونیور، بهوده کشف ایچون اوغراشیوردی. ضبطیه
ناظری میرالایی براز دها تشجیع ایچون علاوه ایتدی :

— سنك اوزی ، سوزی طوغری ، ایچی ، طیشی بر
برآدم اولدیغنی بن پك ای بیلیرم. بو وظیفه یی حسن ایفا ایده-
جککی ده اونك ایچون تقدیر ایدرم ، یالکنز بو مسئله ده براز
دها حسسز اولق لازمدر .

میرالای بو پك مهم مقدمه لرله تودیعی ایکیلن وظیفه نك نه
اولدیغنی بر آن اول آ کلامق ایچون ناظری استیضاح ایتک ایسته دی:
— عجبا بومأموریت ؟....

— شمدی هیچ برشی صورمه ! یالکنز ویره جکم تعلیماه

دقت ایت :

بورادن چیقوب ، طوغریجه آخور قپویه ، ساحله کیده-
جکسک ، اوراده استیم اوستنده برواپور کوره جکسک ، سنی
برصندال آلوب او واپوره کوتوره جک و سن واپوره چیقنجه
سفینه ده حرکت ایلیه جک. کمی ده سکا تخصیص ایدیله جک اولان
قاره یه کیره جک واپور چناق قلعه بوغازندن چیقوب ده سد البحر

فزاری آرقہ دن غائب اولدینی صرہده النده کی قبالی ظرفی آچاجق ،
 او قویہ جق ، او وقت وظیفہ مأموریتکی آکلایہ جقسک .

— افندمن ، عجباً کیدیلہ جک یول اوزاقی ، البسه ، چاشیر
 فلان آلهیمی ؟

— شمدی معیتندہ کی چاوشی اویکہ کوندر ، بر چانطہ یہ
 برقات البسه ، برقاتدہ ایچ چاشیری قویسونار ، آلسین ، کلسین .
 ایستہ او قدر .

میر آلالی بومعما انکیز امری آلدقن صو کرہ علی العجلہ
 نزد نظارتیناہیدن چیقوب معیت چاوشنی اوینہ کوندردی وبر
 ساعت صو کرہ کلن باوولنی چاوشک انہ وبرہرک آخور قویہ
 متعازم اولدی .

*

کیجہ آلاتورقہ ساعت اوچ رادہ لرنده اوزمانک اک سریع
 السیر سفینہ سی اولان (عزالدین) واپور ہایونی آخور قپو
 پیشکاهندن ، چنتہ باجالرندن کو یاملنک دود آہنی پوسکور بیورمش
 کی دومانر صاچارق مفارقت ایدیور ، عین زماندہ ساحلہ کی
 اسکی سورک برج خرابندن واپورک قوش سرعتیلہ مرمرہ نک
 سطح سیمینی اوزرنده قایشنی تماشایدن برکیجہ قوشی ، بر
 باقوشدہ او قورقونج صیجہ سیلہ نعرہ زن شامت اولیوردی .
 عزالدین واپوری اولانجہ سرعت وچالاکیسی ایلہ مرمرہ

دکزنی یاریور، سرمه آطه‌سنی صولنده براقه‌رق ایلرله یور، کلیبولی استقامتنه طوغری یول آلیوردی . سفینه تام بولایر حذاسنه کلدیکی صروده قیچ قاره‌سندن چهره‌سی مایح جسمی نحیف ، طرز تلبسی بسیط بر آدم کوکرتیه چیقوب ناشی او دیک ساحلله ره توجیه ابتدی . برشی کورمک ایسته‌بوردی ... براز آرادقدن صوکره پک چوق زماندن بری اوزله‌دیکی جاباتی بردن بره قارشیسنده کورن برعاشق آزرده دل‌کی کولومسه‌دی والنی بولایر تپه‌سنده کوردیکی نقطه‌یه طوغری اوزادوب شو سوزلری دوداقلری آره‌سندن دوکدی :

— بیوک آدم ! سکا بیکلرجه سلام و تحیات !

بوسس واپورک پروانه چارپنیلری آره‌سنده غائب اولوب کیتدی . آرتق صباح اولیوردی، کلیبولی لیمانی چیلیرکی اورتاق آغارمش، شهرده ایرکن قالقوب‌ده اوزاقدن (عزالدین) قوش کبی اوچوشنی کورن اهالی یکی بر مژده ظفر کتیره جکنی ظن ایدرک آنی پرشوق و سرور اقدن غائب اولونجه‌یه قدر کوزلریله تعقیب ایدیورلردی . حال بوکه عزالدین ، بو سیاحتیه ملتک برات حریت و سعادتنی آق دکزک قهر نایابنه کوممکه کیدیوردی .
زواللی ملت !

بووجهله کلیبولی ، چناق قلعه ، قوم قلعه ، سیدالبحر کپیلرک صاغه امروز، صوله‌ده بوزجه آطه‌لری آلدقندن صوکره

سفینه به صوت سرعتی ویرلدی . سفینه نك يولى تنظيم ايدىلوبده قوماندانوتى ايكنچى سوارى به توديع اولمىنى متعاقب سوارى سفینه، ميرالاي بحرى بلك اقامت ايلديكى قاره به كلرك شمدى ينده كى تعليماتمه يي آچه بيله جكنى سويلدى . ميرالاي بو آدمك كنديسنده بيله قپالى برامرنامه بولنديغنى و نام بوسره ده آچيله جغنى نهدن بيله بكنى دوشونوب حيرت ايتمكله برابرذاتاً ناظر باشادن ده بويولده امر تاقى اتمش اولديغندن بلاتردد قابوطنك ايچ جينه صاقلامش اولدغنى معهود قپالى ظرفى چيقاروب آچغه تشبث ايتدى . ظرف ببرتيلنجه سوارى كنديسنك وظيفه سى بو اخطارى ايفاليتمكدن و ظرفك بوزجه آطه استقامتمده آچيلديغنى كورمكدن عبارت اولديغنى بيان ايله قاره سنه چكلى .

بحرى بك پرتلاش مظروفى شويله جه او قومغه باشلادى :
 «ممالك الحنبليه دن آرزو ايلديكى هر هانكى برينه چيقيمق اوزره ديار عثمانيه دن طرد و اخراجى سلامت مملكت (?) نامنه مقتضاي اراده مهابت عاده حضرت شهر يار اعظمه دن اولان مدخت پاشاني ايسته نيكي براجنبي ليمانه عزالدين واپوريله ايصاله مأمور اولان امراي ضبطيه دن ميرالاي بحرى بلكه تعليماتدر :

۱ - مدحت پاشا در سعادت دن عزالدين واپوريله چيقاريله جق اولوب مذ اور واپور كور و صو احتياج مبرمى قطعياً تحقق ايتمكجه هيچ عثمانلى ليمانه اوغراميه جقدر .

۲ — اویله بر احتیاج قطعی کورولدیکی تقدیرده ایسه واپور
 اوغرایه جنی لیمانده پک آچیق دمیرلیه جک . زنهار و زنهار
 واپورک قره ایله اختلاطنه ومدحت پاشانک هیچ کیمسه ایله
 کوروشمسنه میدان ویرلمیه جکدر .

۳ — واپور دروننده ضابطان و افراد ایله ده کوروشدیرلمیه -
 جکدر .

۴ — هر هانکی بر اجنبی لیمانه بر اقلیر بر اقلماز ، واپور
 اورادن مفارقت ایده جکدر .

میر آلی بحری بک بالاده محرر مواد اربعه نك حرفياً اجراسنه
 مأمور اولوب تسیب واهمال موجب مجازات اوله جنغنی بیلمایدیر .
 زوالی آلی بکی بوکاغدی او قودقندن صوکره عزالدین
 واپورنده کی مأموریتنی آ کلامش ، پاشانک زرده اولدیغنی
 اوکره نه بیلمک ایچون سواری ایله بر ملاقانه لزوم کورمنز ایدی .
 بو ملاقندن آ کلادی که مدحت پاشا کمیده و قیچ قاره سننده
 بولنیوردی .

عزالدین واپوری تقریباً پیره آچیق لرندن کجیوردی . وقت
 اقسام ، هوا پک لطیف ایدی . ا واردیا نزلرندن بری کله رک
 سواری بکک حساب قاره سننده کندیسینی بکلمکده اولدیغنی بحری
 بکه سویله دی . میرالای بو دعوتدن برشی آ کلایه مامقله برابر

گوپری اوستنده کی سواری قمارسنه کیتمکده استعجال ایتدی .
 واپورک سوارسی کمال تأثرله شمدی چرخچی باشیدن آلدینی
 رسمی برراپورده کمی ده موجود کمورک آنجق برقاچ میل ده
 اداره ایدیه بیله جکنی ، اکر مدحت پاشانک آرزوسی وجهله سفینه
 طوغریجه برندیزی به کیده جک ایسه مطلق پیره لیماننده برانهور
 آلمق لازم کله جکنی افاده ایتدی .

سواری ایله میر آلائی بردن یکدیگرینک کوزلری ایچنه باقرق
 ته یایمق اقتضا ایدیه جکنی آ کلامق ایستدیلر . فقط ایکسی ده
 متحیر ، مبهوت ایدی . ضبطیه میر آلائی اول دورانهرق صوردی :
 — سزک الکزده برتعلیمات یوقی ؟

— وار ! فقط ظن ایدرم طبقی سزک کی کی !
 سواری بونی سویلیوب جیبندن اوافق برکاغد چیقاردی
 و بحری بکه ویردی . بوتعلیماتنامه ده حقیقه اوته کینک عینی ایدی .
 بالمشاوره پیره به اوغرانیلهرق کمور آلمسنی و کمورک سفینه نیک
 سندالریله وعسا کر شاهانه معرفتیه نقل اولنوب خارچدن
 کیمسه نیک کمی ایله اختلاطنه میدان ویرلمه مننی قرارلشدیردیار .
 بو صورت تعلیمات ده بدرجه به قدر موافق ایدی ، یعنی تعلیماتنامه ده
 بو صورتیه جوار وار ایدی .

قرار واقع اتخاذا اولندقدن سوکره سواری ، حساب مأموری
 ایله برلشهرک سفینه پی پیره یولنه توجیه ایدیه جک صورتیه برروطه

طوتدقن صوکره قماره سنه چکلدی و بجرى بكده هوانك مساعده سندن بالاستفاده هنوز طلوع ایتمکه بولنان قمرک مهابت ولطافتنی تماشا ایده کوکرته ده کزینمکه باشلادی .

برقاج وولطه اوردقن صوکره اکثر دفعه کوکرته ده تصادف ایتدیکی مدحت پاشانك آغاسی یاسنه صوقیه رقی :

--- پاشا افندمن سزى کورمك ایسته یورم

دیدى . مدحت پاشانك محافظی یینه مشکل موقده قالمش ایدی . پاشا ایله کوریشوب کوریشه میه بکننه دار تملیانه صراحت وقید یوق ایدی . عجبیا اونکله کوروشمک مستوجب تهمت می ایدی ؟ فقط نیچون اولسون ؟ برضا بده ، مأموری هرکسه کوریشه بیلیر ... علی الخصوص محافظه سنه مأمور اولدینی ذات ایله ... بودوشونجه لر سرعت برقیه ایله میر آلیک ذهنندن کچدی و کوروشمکه قرار ویره رک آغیه :

— باش اوستنه ، شمدی کلیر ، تصدیع ایدرم .

دیدى . محافظ قلباً هم ممنون ، هم مغموم ایدی . ممنون ایدی ، چونکه مدحت پاشا کبی برداهی ایله یالک زجه کوروشه رک اونك بك متواتر اولان افکار علویه سندن استفاضه فرصتی انه کچوردی . مغموم ایدی ، چونکه بوملاقات حقنده کندیسینی عودتده صیغیه چکملری خوفی وار ایدی . هرچه باد آباد ستره سنك کوکسفی ایلیکلیه رک ، فسفی ، پوسکلنی دوزلته رک طبقی

بر صدر اعظمك حضورينه كيرر كې مدحت پاشانك كمال متانت
 وصالبتله او طور مقده اولديغى قبيچ كو كرتتسى اوستنده كى
 كوشكه كيردى .



[اوچنچى قسم]

پاشا ، کو کرته سالونک نهایته یقین بر قنابده او طور مش ،
 النده کی تسیحله عصبی بر طور له اوینا مقده ، بولنش ایدی . محافظنی
 کورونجه کولومسه دی :

— نزی دیار اجنبیه ایصاله سزی می مأمور ایتدیله ؟
 اولاری بزم کبی منفیاری دغوی چاوشاری کورورودی . شمدی
 میر آایلر کوروریور دیمک که قیمتمز آرتمش !

جمل معنیدارینی سویلدکنن سوکره علاوه ایتدی :
 — محافظه مه سزک کبی اصیل و مرد بر آدمی انتخاب ایتدیکندن
 طولایی پادشاهه تشکر ایتمک لازمدر . انشاه بر ندیزی به
 چیقدیغمده یازارم .

محافظ بک فنالاشدی . او وقتک پولتیقه سنجه مدحت پاشانک
 حقنده توجھکار بر کله یازمسی کندیسنی فیزانه قدر نفی ایتدیله .
 بیلیدی . بو توجھک رایکان بیورلما منی استرحام معرضنده دیدی که :
 — افندمن ! بزم شمدی که حیثیت واعتبار مزده اولکی

دعاوی چاوش-لرندن فضله دکلدر ، مع مافیہ اکر بویولجیلقدہ
 افندمزنک راحت و حضورینی تأمین ایده بیلیرسه م وظیفه و وجدانیه می
 تماماً ایفا ایتمش صایلیرم که بوده نیم ایچون اک بیوک مکافاتدر .
 بشقه مکافات ایسه بکله م .

— بحری بک ! سزکله شووسیه مؤسسه ایله کوروشدیکمدن
 طولایی حقیقه ممنونم . اولجه سزک مدح و ثنا کزی ایشیدیرده
 مبالغیه حمل ایدردم ، شمدی ایسه کوریورم که سزمسلسککزک
 اری ، وجدانککزک کولهسی بر آدمسکز ...
 — توجه دولتکز افندم

بحری بک مدحت پاشانک نزدنده چوق ، هم پک چوق
 اوطورمق ، استفاده ایتمک ایسته یوردی . فقط پیره فنارینک
 کوروندیکنی معن اولوق اوزره چالینان قامپانانک صداسی بحری
 بکی استحصال رستصت ایله کوکرتیه چیقمنه ، سواری ایله
 لیانه صورت دخولی و تفرعات سائرسنی مذاکره یه مجبورایتدی .
 بر ساعت صوکره عزالدین واپوری ضراندی دیرکنه وزیر
 بایراغی بیله چکمه که لزوم کورمه دن پیره لیانسه داخل اولوب
 ریختمدن خیلی اوزاق بریره دمیر آتمش ، سواریسی ایله
 ایکنجیلی سربعاً کور تدارک ایتمک اوزره برصندال ایله قره یه
 چیقمنش آیدی .

ایکی ساعت صوکره عزالدین واپورینک بتون فلککری

ریختم اوزرنده کی مغازه لرك برندن کمی به کور پوسته ایتمک باشا دیار .
 او کون آقشامه قدر کور نقلی دوام ایتدی . بوضورت نقلک
 غرایتنی پیره لیلر درلو درلو تفسیر ایدیورلر ، فقط بر معنای
 صحیح چیقاره میورلردی .

*
 **

آقشام اوزری ریختمن باش طرفنه عثمانلی سنجاغی هر کوز
 براستمبوطک حرکت ایتدیکنی سواری ایله محافظ کوردیلر ،
 استمبوط (عزالدین) واپورینه طوغری کلکده ایدی . بالطبع
 کینک ایچنی بر تالاشدر آلدی ، عجبا بوکان کیم ایدی ؟ هر
 حالده باش طرفنه عثمانلی فورسی چکلمش اولسنه نظر آ استمبوط
 دروننده یا آتیه سفیری ، یا خود پیره باش شهبندری بولنق محتمل
 ایدی . سواری ایله محافظ هر کیم اولورسه اولسون کان ذاتک
 ویا ذاتارک مدحت پاشا ایله کوروشمسنه امکان قالماق ایچون
 طوغریجه باش طرفه ایصال واوراده یعنی کوکرته اوزرنده
 قبولی درحاک قرارلشدیریلوب محل قبوله برقاچ صندالیه ایله بر
 ماصه وضع ایتدیرلدی . بو حاضرلق ختام بولوربولماز استمبوطده
 واپورک سنجاق قبیچ اسکله سنه یا ناشدی . سواری ایله میر آلی
 بحری نک کیمک چیقاجغنی کورمک اوزره اسکله یاننده کی
 کویشته یه یا قلاشمشار ، سیر ایدیورلردی .

استمبوطنن ایلک چیقان ذات واپورک سردیوننه آیاق
آتا آتماز، قوماندان ایله محافظ کمال حیرت و تعجبله برلرینک
یوزلرینه باقدیلر. بو ذات او زمانک قهرمان سیالرندن، حوریه
نظارتنه، حتی مقام صدارته نامزد، موقی غایت مهم برمشیر
ایدی. اونک آرقه سندن ده باشنده شایقه سی، صرتنده برنوروی،
النده آلتون باشلی باستونیه باش شهیندر (اکسه لوس) افندی
چیقدی. سواری کندیسنک بونلره قارشى پاهجق و طیفه سی
اولدیغنی محافظه سرعتله بیان وقارهنه فرار ایلدی. اسکله
باشنده یالکز قالان میر آلاى بحری بك بو مهم زائرلک قیچ
طرفه کی کوکرته گوشکنه کیده مهملرینی تأمین ایچون ندیلرینه
وظیفه سلام واحترامی ایفا ایده جک اولان افراد عساگری
دیوارکی او طرفه دیزدی ایسه ده مشیر پاشا ایله شهیندر افندی
مدحت پشانک قیچ گوشکنده اولدیغنی پک ابی بیلدکرینی
کوستر بر طورله کرک محافظی و کرک عسگری سلاملایه رق
طوغریجه او جهته یورودیلر. دیزیلن عسکر ایسه فوجه بر
مشیرک کندیلر. اوزرینه کلدیکنی کوره دک طبیعتیه یول آچدیلر،
مشیر پاشا ایله شهیندرده بلا تکلیف و تکلف گوشکه داخل
اولدیلر. محافظ بك بو حرکتله آرتق هر شینک اولوب بیتدیکنی
حتی کندیسنک ده برابرجه محو اولدیغنی ادراکده کیکیمیه رک

هرچه باد آباد سالونده حاضر بولمنی قرارلش-دیروب اونلرك
آرقه-سندن اوده کیرهرك برکوشه یه بوزولدی .

مدحت پاشا زائرلینی پك بشوش بر چهره ایله استقبال
ایدوب مشیر پاشانك الندن طوتهرقی یاننه او طور تدقندن صوکره
دیدیی که :

— پاشا ! ذات عالیکزی استانبولده پارلاق بر ص-ورته
استقبال ایدنار میاننده بنده بولمنق ایستردم . فقط فلك مساعده
ایتمدی

مشیر پاشا پك متأثر اولدینی حالدہ جواب ویردی :

— ذات سامیلرینك توجهی بنجه اك پارلاق استقبال
مراسمندن دعاقیمتداردره انشااه یقینده عودت بیوریرسکزده
استانبولده الکززی اوپمك شرفنه نائل اولورم .

— واپورده بولندیغمی نصل خبر آله بیلدیکز ؟

— اعاده زیارت ایچون دون پیره محافظنك یاننه کیمش
ایدم ، ذات عالیلرینك ممالک اجندیه یه چیقارلمق اوزره عزالدین
واپوریه استانبولدن مفارقت استدرلدیکنی بئذکزد اوسویلهدی .
واپورک برایه وصولنی کورونجه طوغریسی دایانه مدم ، زیارت
عالیکزه قوشدم .

— فقط بو حرکت ، سزك ایچون تهلیکه تشکیل ایده بیلیر .

— بنده کز اونی دوشونم. دوشوندیکم ، غیبو بتکزدن
استفاده ایده جک خائسرك وطنه اوره جقاری ضربه لر در .
مدحت پاشا بوجوابه قارشی بر « آه ! » دیدی. کوزلرنده
بلیرن دموع تأثری پک کوچ ضبط ایده بیلپوردی. بوسر ده شهیندر
آکسه لوس افندی مشیر پاشابه کوزیله اشارت ایدرک یالکیز
اولدقلرینی، براز اوتته ده محافظنک، اوطور مقده بولندیغنی اکلائی.
بواشارتی پک اینی اکلایان مدحت پاشا هر ایکی مسافرك مستریح
اولمیرینی تأمین ایچون دیدی که :

— او . . . محافظ بک ، بیلدی ککیز ضبطیه جاسوسلرندن
دکدر ، او ، مرد ، انسانیتلی ، علی الخصوص دینانی ، دولتی
سور بر آدمدر ، اوندن چکنمکه هیچ لزوم یوقدر .

بوسوزلر زائرلر اوزرنده بالطبع اطمشان بخش اوله رق
مشیر پاشا قبل المقارقه علمنده چوریلن آنتریکه لر حقمده مدحت
پاشادن بعض شیلر استیضاحیه جوابلرینی آلدقن صوکره وداعه
حاضر لاندی. ایکی وزیر کال صمیمیتله مصافحه ایتدیار. مدحت
پاشا بروظیفه وطنیه دعا ایفا ایتمش اولمق اوزره هر کسک ایشیدد.
بیله جکی یوکسک سسله و مشیره خطابه :

— پاشا حضرتلری ! استانبوله کیدیورسکیز ، بالطبع
حضور شاهانه یه قبول ایدیه جک، بنمله نه کوروشدیککیز حقمده

استجواب اولنه جقسکز . پادشاه ، مدحت پاشا نه دیور، دیه
 صوراجق اولورسه رجا ایدرم شوپله :

« بن وطن جدا اولدم، فقط قلم، روح مملکتده قالدی.
 بن غربت ایلرنده ترك حیات ایدرسه م روح فعالم مملکتیم ایچون
 قیامتده قدر یاشایه جق ، وطن خائنری ایچون دائمی بر کابوس
 اوله جقدر . » دیدی ، دیککز . جمله سیله مسافر لرینی صالونک
 قیوسنه قدر تشیع ایلدی .

*
 *
 بومهم زائرلر مفارقت ایتدکدن ایکی ساعت صوکرده
 عزالدین واپوری پیره لیمانی ترك ایدرک آق دکزک چیرنقیلی
 طالغعلری آرهسنه کومولدی . واپورک حرکتندن یارم ساعت
 اول محافظ بک قارهسنه چکیلرک « مشیر (. . .) پاشا ایله
 شهنسارک بغته واپوره کلهرک مدحت پاشا ایله کوروشدکلرینی،
 بوملاقانک عدم وقوعی ایچون بک زیاده چالیشلمش ایسه ده منفنه امکان
 بولنه مدیغنی ، مع مافیله انهای ملاقاتده کندیسنگده حاضر بولنوب
 کرک شخیص همایون وکرک اداره حاضره حکومت علیهنده
 آره لرنده حرف واحد جریان ایتدیکنی « حاکی بر تلغرافنامه
 ترتیب و تحریر وسفینه ضابطانندن بر ملازم ایله قره یه کوندروب
 استانبوله کشیده ایدمک اوزره تلغرافخانه یه تودیع ایلش ایدی .
 وقت کیجه یاریسنه یاقلاشدیغنی برصرده مدحت پاشانک

آغاسی کلهرک پاشانک کندیسيله کوروشمک ایسته دیکنی محافظه
تبلیغ ایلدی . محافظده ستره سنی کیوب قیلنجی طاقه رق تام
برعسکر وضعتیه پاشانک حضورنده اثبات وجود ایتدی .

مدحت پاشا برپردرک اولادینه قارشى اولان معامله سی کبی
لابالیانه برطورله بکه یانی باشنه او طور مسنی اشارت ایدوب بعض
سؤالر صورتیه باشلادی و آر دلرنده شویله بر محاوره جریان ایتدی :

-- بیری بک ! خدمتکدن ممنونیمسک ؟

-- شو آنده افدمزک معیتنده بولنق نیم ایچون اک

بیوک شرفدر .

-- فقط براز صیقینتیلی ایش دکللی ؟

-- افدمزک یوزندن کله جک هر فالنه بتون متاتله کوکس

کرمکه حاضریم .

-- مشیرک وشپیندرک ورودی مأموریتکی براز اشکال

ایتدی ظن ایدرم .

-- پاشام . طوغریسی اولیه... فقط طوغریلرک یاردیمچیسی

الایدر .

-- سن نجیب بر آدمسک... اکر سنی بوملاقات یوزندن

طرد و یا خود نفی ایده جکلرینی تخمین ایدیورسهک بمله برابر

اوروپانه قال ! البته اه کریمدر .

— بونتکلیف شرفی بنده کزہ مادام الحیاء کفایت ایدر .
 بنده کز استانبولہ دوز ، اورادہ حقیقتک تظاہرینہ چالشیرم ،
 البتہ فرصت دوشر . یالکز افندمر مستریج ومطمئن اولکز .
 — بنم لہمہ حرکت ، سنک بادی ادبارک اولور اوغلم .
 بن پادشاہی ہر کسدن اپنی طائیرم ، صاقین اویلہ برمساک طومتہ...
 سن کنجسک استقبالك وار ، یالکز سکا ویریلن امرلری حسن
 ایفایہ چالیش ، کافی... فقط دقت ایت ، اجرا ایدہ جکک وظیفہ
 وجدانک صداسیلہ مترافق اولسون ... چونکہ کوریورم ،
 ہنوز اخلاقک افساد ایدیلہ مہمش ...

— حسن توجہ کزلہ چالیشہ جنم افندم !

— پادشاہنہ واونک تمثیل ایتدیکی دولتہ صادقانہ خدمت
 ایدنلر داریندہ مسعود اولورلر . سن بنم ایلہ پادشاہ آرسنہ
 کین حائلہ باقہ... او حائل نہ قدر شدید ، نہ قدر قوی اولورسہ
 اولسون بر آووج اون قدر حائر اہمیت دکدر ، بر کون قوتلی
 بر روز کار چیقار ، اونی برہوا ایدر ، خادم ایلہ مخدوم برلہ شیر...
 وطن کولر ، وطنداش کولر ، مملکتدہ سعادت حکمران اولور .
 — فقط آرہدہ افندمن کبی نادرہلر محو وتباہ اولور .

— اونک ہیچ اہمیتی یوق... بن دکل ، بنم کبی بوزبیک
 وطنداش محو اولسوندہ ، تک وطن کولسون ، مقصداو در .
 محاورہ بونقطہ یہ کلنجہ محافظت اثراتی کتہ مہ موفق اولہ میہ رق
 آغلامغہ باشلادی و :

— آه ... نیچون بویله اولیور؟ دیدی . پاشا ، کندی ده
 يك متأثر اولدیغی حالده جواب ویردی :

— اوغلم، ظن ایدرم سن، عثمانلی تاریخی مطالعه و تدقیق
 ایتمه مشسك ... اکر او قومش اولسه یدك كوره جك ایدك كه ،
 بنم شواوغرا دیغم فلاكت اسلافزك سرانجامنه نسبتله عادتا دوكونه
 کیتمک قییلندندر . تشکر ایدلم که باشمز بالقخانه تکنه لرنده ،
 جسد مزده مرمره طاغعلری آره سنده یوزمیور . البته صاغ
 قالمق، اولمکدن ده امد ایدر . امید ایدم، مملکت مزك سلامتندن
 هنوز قطع امید ایتمک درجه لرینه کلدک . مادام که بوکون
 یاشایوروز، اوسوکیلی وطنه خدمت ایتمکده امکان وار دیمکدر .
 — عجا قریباً عودت دولترلی امید اولنه بیلیرمی ؟

— آلهک لطفندن هرشی منتظر در .

— بادی فلاکتکز اولان اشخاص لیئمه حقنده هیچ

برشی دوشونمیور میسکز ؟

— اوندر عن قریب بربرلرینی یرلر ، کندی کندی لرینه

محو اولورلر . چونکه قانون طبیعت مقتضاسی بودر .

مدحت پاشا بوسوزلری سویلدکن صوکره یاتمیق وقتی
 کلدیکندن بختله محافظنه رخصت ویردی .

ایرتسی اقسام غروب دن صوکره (عزالدین) واپورینک

پروا سندن برندیزی لیمان کوروندی . سواری ایله محافظ
 قوماندا کوپریسی اوزرنده بولنیورلر ، شهرک منظره سنی
 تماشا ایدیورلردی . عین زمانده فدا کار وطن مدحت پاشاده
 قیچ طرف کو کرته سنه چیقمش ، وطن جدا وجودنی نصل
 بر صغو قلقله قبول ایده جکنی کس دیره مدیکی بو بیانجی شهره
 حزین حزین باقیوردی .

سواری سردومنه : کمینک باشنی لیمان آغزینه توجیه
 قومانداسنی ویردی . محافظ اعتراض ایتدی :

— بک افندی! وقت کج، برندیزی غرو بدن سو کره سفان
 اجنبیه دخولی ممنوع اولان بر لیماندر، بوراده دمیر لیهیم، علی الصباح
 کیره رز . دیدی .


— خیر ، خیر ، بر آن اول شو آغیر یوکی اوزر مزدن
 آتارق قورتیله لم . . .

سواری تام صوک جمله بی بتیر دیککی صروده ایدی که لیمانک
 اوزرنده کی قلعه دن عزالدینه طوغری قوری صیتی بر طوپ
 آتیلدی . طوپ سنی ایشیدن محافظ ، سواری یه باقرق :
 — دها کیده جکمی یز ؟

دیه صوردی . سواری ایشک شقه یه کلیه جکنی ا کلا یه رق
 (فوندا) قومانداسیله دمیر براقدی وغایت متأسف اوراقنی
 تنظیم ایتک اوزره قماره سنه چکلدی .

بش دقیقه سوکره لیاندن حرکت ایدن سرعتلی بر موش
 (عزالدین) ه یا قلا شه رق کویشته یه سواری بی ایستدی و: اگر
 مدحت پاشا کمیده اولوب ده شمدی چیقماق ایسته یور ایسه لیان
 نظامنامه سی اونک حقنده استنا ایدیله رک چیقارلمسی حقنده رومادن
 برندیزی متصرفلغنه امر وارد اولدینی تبلیغ ایدلدی . کیفیتدن
 خبرادر اولان مدحت پاشاده ارتق سیاحت بحریه دن اوصانمش
 اولدیغدن ایتالیا حکومتی طرفندن کوندریلن مزین موشه
 را کباً قره یه چیقدی وو اپوردن اثنای مفارقتنده ایرتسی کون
 کلوب کندیسی کورمسی محافظندن رجا ایتدی .
 ایشته بو بیوک آدم وطنندن بو صورتله جدا ایدلمش ایدی .
 وارسون بوندن ده تاریخ اوتانسون !





صدر اعظم غائب اولمش!



لسان اکثریتک دور سابق تسمیہ ایتدیکی عهد عجیبک
اک پارلاق ، اک شایان اهمیت صدر اعظم لرندن بری [*] برکون
قرقلرمی قاریشمش ایدی ، ای ساعتده اولسونلر ، اونلرمی
التحاق ایتمش ایدی ، نه ایتمش ایسه ، ایتمش ، بردن بره غائب
اولمش ایدی ! .. ییلدیزله باب عالی ، ضبطیه نظارتی ایله مرکز
قوماندانلغی بربرینه قاریشمش ، اورته لغی فوق العاده بر تلاش
آلمش ایدی ...

صدر اعظم پاشا حضرتلرینی اک اول غائب ایدن ذات سر
یاور حضرت صدر ایتناهی ایدی . باقکنز نصل اولدی :

[*] غائب اولان صدر اعظم کچنلرده ارتحالی وقوع بولان مجلس
اعیان رئیس سعید پاشا ایدی .

عهد عجيبه صدر اعظمك باب عالی به صورت ورودلری ایله مفارقتلری برطاقم مراسمه تابع ایدی . . . صدر اعظم ، سرکه جی طرفدن کردونه سوار عزووقار اوله رق اوکله دن براز سوکره کوروندیمی ، همان یکدیگرینه اقطارمه ایتمک صورتیله کوزجیلر معرفتیله باب عالی ده انتظار ایدن بوریزن تقرینه بر آنده خبر ایصال ایدیلیر ، اوده صدارت بوریسنی اوتدیره رک پاشانک تقرینی علاقه دارانه اخبارایلر ایدی . اوزمان کرک یاوران ، کرک چاوشان ایله صدارت ارکان مأمورینی آرره سنده برحاضرلق علائمی کوریلور . مثلاً سر یاور پاشا قیلدجینی بلنه طاقار ، کوکسینی ایلیکلر ، کندینه چکی دوزدن ویره رک بینک طاشنه قوشار ، آرابه دن چیقاجق اولان صدر اعظمی قولندن طوتمق ایچون بر طور مخصوص آئیر ؛ دیگر یاورلر ایسه باشلرینه تبعاً بر وضع احترامکارانه ایله صف تشکیل ایدره رک صدر اعظمک ویره جکی سلامه مقابله به حاضر لانیرلر ، قواصلر ، چاوشلر ، اوطه جیلر دیزیلیر . دائرة صدارت ارکانی اوطه لرینک قپولرینه چیقارق التفات صدارتپناهی به منتظر بولنورلردی . کلیش بویله اولدینی کبی کیدیشده همان عینی ایدی . اللهم کونی بو مراسم نقطه سی نقطه سنه تطبیق ایدیلیر ، فضله ، اکسیک هیج برشی وقوع بولماسنه فوق العاده اعتنا اولنوردی . بو عادتاً برقانون لایتغیر ایدی !

کونلردن برکون۔ کہ رمضانک اواسطنه طوغری ایدی۔
عصرک صدر اعظمی علی العاده ایکندی وقتی آرابه سنک حاضر۔
لانمسنی امر ایتدی . ینه تلاشلر ، ینه حاضر لقلر باشلادی .
آرابه بینک طاشنه یناشدی ، یاورلر ، چاوشلر وغیر هم
صره صره دیزلادی . پاشا قولتوقلانهرق بیک مشکلات ایله
قوپه نك دار قپوسندن ایچری قونولدی . النده کی چانطه سیله
باش آغا آرابه جینک یاننه فیرلادی ، سر یاور تمناسنی چاقدی .
آرابه بتون احتشامی ، بتون دبدبه سی ، بتون عظمتیله حرکت
ایتدی . باب عالینک پارمقلق قپوسندن چیقوبده سر که جی یه
طوغری آشاغی یه دونه جکی صره ده صدر اعظم پنچره دن باشنی
اوزادوب اسب سوار آرابه نك آرقه سنده بولنان نوبتجی یاور
ایله چاوشلره کنیدیلرینک وجودینه بوکون احتیاج اولمدیغنی ،
کیدوب راحت ایتملرینی امر ایتدکن صوکره آرابه جی یه ده :
- سلطان محمود تر به سنه طوغری چک ! اراده سنی ویردی .
آرابه سنه لردن بری هیچده کیتمدیکی یوله توجه ایتدی .
حیوانلر بیله عادتاً عصیان ایدیور ، اعتیادلری خلافنه یوقوش
یوقاری و برسمت مجهوله سوق ایدملرندن متولدجان صیقینتیسنی
اظهار ایلوردی . برایی قامچی شاقیردیسنی متعاقب صدر اعظمی
حامل اولان آرابه ایران سفارتیله نافعہ نظارتی آره سننده کی
دوزلکده کوزدن غائب اولدی ، کیتدی .

سریاور پاشا بینک طاشنده آلیقلاشمش ، قالمش ایدی ...
 آرابه کوزدن غائب اولوتجه به قدر کمال دقتله تعقیب ایتدکن
 صوکره عجله او طهسنه عودت ایله ایکی اوچ سطرلق برعریضه
 خصوصیه (۱) ایله صدر اعظمک بوکون فوق المعناد یاورسز ،
 چاوشسز باب عالیدن ناکهان مفارقت ایتدیکنی ، کیتدیکی
 ویخود کیده جکی یره دائر کیمسه به معلومات و یرمه سی ایسه
 داعی اشتباه (۱) بولندیغنی صداقت مفرطهسنه بناء بیلدیزه
 اعلام ایلدی ... وای، بره مدد ! .. استانبول برینه کیردی .
 بلوکارله یاورلر ، آایلرله خفیه لر اطرافه داغیلدی ، صدر
 اعظم آرانوردی !

معلوم یا ، اودورده ایشکذارلرک حد و حسابی یوقدی .
 ایلك حمله تحریده کیمی ذات صدارتینا هینک ایران سفارتخانه سنه
 کیردیکنی ، کیمی تاریخ مراقلیسی اولدیغندن بیکچیری موزه سنی
 زیارته کیتدیکنی ، پک آچیق کوزلی اولاندن بریده معقلبری
 شاشیرتمش اولمق اوزره دیوان بولی ، بایزید ، مرجان ، جسر جدید
 طریقله بک اوغلنده کی انکلتزه ویا روسیه سفارتخانه لرندن برینه
 عنیمت ایلدیکنی ، بردیگری ده سرعسکر پاشا ایله مهم برایش
 حقنده خصوصی ملاقات اجرا ایتک اوزره باب سرعسگری به
 داخل اولدیغنی کوزلرله کوردیکنی سویلدیلر و افاده واقعه لرینی
 ژورنال صورتده یازدیلر . بوروا بترلرک ، بومشاهداتک همان

جمله سی بر ، بر بچق ساعت ظرفنده مختلف مرجع لر ، و سطر لر معرفتیه خاقان زمانه عرض ایدلدی . بو قدر سرعت ، بو قدر چالا کی معضلات امورک هیچ برنده او زمانه د کین اختیار اولنماش ایدی . صدر اعظم زه به کیتمش ، نچون یالکزجه کیتمش ؟

سرای خلقی بر در لو بومهم مسئله یی حل و فصل ایده میوردی . صدر اعظم لک هر کون صباح و اقشام مراسم معلومه و معینه ایله باب عالی به کیدوب کلمه لری مقتضای اراده سینه دن ایکن صدر حاضرک بو عادت شکنده که نصل بر جرأته جسارت ایتدیکنه هیچ کیمسه عقل ایردیره میوردی . بر ساعت قدر مدت ایچنده بو خصوص مهمه دائر وارد اولان ژورنال لک عددی تام (۳۷) به بالغ اولمش ایدی . اک ضریبی ، بو ژورنال لر میانده برده بحریه ناظری امضالیسی بولنمسی ایدی . بو ژورنالده : « تحریسی فرمان بیوریلان صدر اعظمک ترصده مأمور سفائن حربیه طرفندن کوریلله مه مسنه نظر آ بجرأ بر طرفه کیتمدیکی لیمان ریاستی افاده سیله ، بیلدیریلیوردی . مع مافیه او توزیدی ژورنالی ماصه سنک اوزرنده کورمکدن متولد بر توهم خشیتکارانه ایله کندندن کچن پادشاه ، اک زیاده « سفارتخانه لردن برینه ... » قیدینی احتوا ایدن ژورنالی نظر دقتده طوتیور ، ندیم خاصلردن برینی چاغیروب بو بایده مذاکره ایدیوردی :

— نه دیرسک؟ حریف عجب هانکی سفارتخانه به کیردی؟
 — شوکت مآب! افندمزک مطالعات همایونلری عین الهامدر..
 تزه به کیده جک؟ یا انکلتره سفارتخانه سنه، یاروسیه ..

— هایدی اویله فرض ایدهلم، سبب؟ ..
 — معلوم شاهانه کنز اولدینی اوزره صدراعظم بر ازو هامدر،
 صوک مسائل معلومه ده توجه شاهانه لرینک قریب الازاله اولدینی
 ظننده بولنیوردی. بونی قولکنز حس ای دییوردم ..
 — اویله ایسه مطلقا بوژورنال مفادی طوغریدر. یازانه

الی لیرا ویرلسون!

— فرمان افندمزک!

— بتون سفارتخانه لرده حس ای دیله میه جک صورتده ترصد
 ای دلسون، هانکی سندن چی قاجق اولورسه بکا معلومات ویرلسون!
 — فرمان افندمزک

صدراعظمک غیبیتندن بر بچق ساعت صوکرده، بر منطوق
 امر و فرمان همایون ملو کانه سفارتخانه لرك اطرافنی جواسیس
 آلابیله احاطه ای دلمش ای دی. عین زمانده سریاور صدارتیناهی
 سرای همایونه جلب اولنه رق صدر اعظمک باب عالی دن صورت
 خروج و آرابه یه رکوبیله حرکتی حقنده کن دی سندن معلومات
 مفصله (۱) آلتیوردی. نتیجه ده سرعت ممکنه ایله عرض
 معلومات ایتمش اولسی نزدالهام وفد حضرت پادشاهیده مظهر

تقدیر اولدیغندن کندیسنه برنجی رتبه دن مجیدی نشان ذیشانی احسان بیورلدینی تبلیغ و تبشیر قلندی .

بونلرک هپسی ائی ، هپسی کوزل ایدی ، فقط حالا صدر اعظم بولنه مامشدی ا افطار وقتی یا قلاشیوردی ... سرایده بر طرفدن یمک حاضر لقلری کوریلیرکن دیگر جهندن صوگ بر خبر بکله نیوردی .

عادتاً افطار طوپندن زیاده صدر اعظمک بولندیغنی خبرینه انتظار اولنیوردی ... بریاور مخصوصه او اقسام سرعسکر پاشاده مستعجلاً افطار سنیه به دعوت اولنش ایدی . بونده کی مقصوده صدر اعظمک او کون سرعسکری صورت خصوصیه ده زیارت ایدوب ایتدیکنک آ کلاشلمسی ایدی . سرعسکر کایر گلز سرای اکبر رجالی اطرافنی آلهرق ایشی کندیسنه حس ایتدیر مکسزین استکنه قویولدیار وبالنتیجه آ کلا دیلرکه ، صدر اعظم باب سرعسکری به اوغرا مامش ... او حالده الک بیوک امید ایکی سفار تخانه دن برنده قالیوردی .

بر آره لق افطار طوپلری آتیلش ، هرکس ، اوروجلی ، اوروجسز هر فرد سفره لره قوشمش ایدی . صدر اعظم تحرقاتی بومناسبتله یارم ساعت قدر دوچار تأجیل اولش ایسه ده او ائنده صدور ایدن یکی براراده خصوصیه بتون ارکانی سفره لرندن فیرلاتمش ، یکیدن صدر اعظم دردیله اوغراشدیرمه باشلامش .

ایدی . بتون سرای خلقی کندی آدمارینی بو باده یکی یکی
 تعلیمات ویره رک اطرافه طاغیتیرلرکن صولوق صولوغه برتفنگچی
 کله رک باش مابینچی یه برکاغد طو تشدیردی . سرای تعبیرنجه
 (بیوک بک) تسمیه اولنان باش مابینچی کوزلکینی طاقوبده
 ظرفی آچارق او قوینجه برندای حیرت اظهارندن کندینی آله مدی :
 — وای جاننه ! .. هیچ کیمسه نك خاطرینه کلمدی ! ...

دیدکنن صو کره ستره سنی کیوب طوغرینجه حضوره داخل
 اولدی والنده کی کاغدی تتره یه رک خاقان عصرک او کنده کی ماصه یه
 براقه رق کری چکیلوب امره انتظار ایلدی . پادشاه کاغده اهمیت سزجه
 برنظر عطفیه مندر جاتنه اطلاع پیدا ایلدکنن صو کره متبسم
 مابینجیسنه دیدی که :

— کور بیورسک زیا چوق مستعد آدم لری کز وار ،
 طوغریسی شایان تبریکسک ز !

پادشاهک بو قورقونج استهزاسنه هدف اولان (بیوک بک)
 کوزلرینی یره دیکمش ، جواب ویرمیور ، یالکزدیکله یوردی :
 — هر کون بو حریفلر ایچون پاره آلیرسک ز ، صو کره ده
 قوجه بر صدر اعظمک قوجه بر آرابه ایله زه یه کیتدیکنی
 ا کلابه مازسک ز بن سزک آره کزده قالمقله حقیقه
 شایان مرختم !


ماینجی برایکی سوزله کندیسنی مدافعه ایتک ایستدی :
— افندمز ... ایشته طوغریسی ...

پادشاه کولیوردی. سرت ویوکسک سسله باغیریوردی ...
— جاسوس درسکمز، خفیه درسکمز، اخبارات مأموری،
راصد، برازدها یوکسله رک صادق بندکان، فدا کارلر، دها
بیلم نلردیه رک بکا بیکلرجه آدم بسله تیرسکمز، هر کون بیکلرجه
لیرالر صرف ایتدیررسکمز، نتیجه ده انسانی چیلدیرته جق خبرلر،
کولونج تخمینلر، صفوق یاوه لر ... اوله دکلی ؟
— افندمز بیلیرلر که

— بنم بیلدیکم برشی وارسه، اوده : هپکزک هیچ برشی
بیامدیکدر . (کتیردیکی کاغدی ماینجینک یوزینه طوغری
فیرلاته رق) هایدی کیت، هپکز احقسکمز ! ...

باش ماینجی، نائل اولدیغی بوالتفات عال العال حضرت
ولی نعمیدن طولایی فوق العاده مغرور اولمش بروضه او طه سنه
عودت ایدوبده قولتوغنه یراشدیکی زمان کندیسنه انتظار
ایدن رفقاسنی مراقدن قورتارمش اولمق اوزره ائنده کی
کاغده باقرق :

— تحف دکلی ؟ صدراعظم باب عالیدن چیمقدقن صوکره
ایکندی نمازینی ادا ایتک اوزره طوغری آیاصوفیه جامعنه
کیتمش، اذانه یقین زمانه قدر مؤذن محفلنک آلتنده قرآن استماع
ایتمش ... افندمز بوخبره کوله کوله بایلیدی، دیدی، هر کسده حیرت !



کرد موسی بك نصل قاچدی؟

[برنجی قسم]

شرقی آناطولی بیوک برولوله ، بیوک برهراج و صراج ایچنده
ایدی . القا ایدیلن تخم فساد بین النعصرین آرزو ایدیلن برودتی
مع زیاده حاصل ایتمش ، کرد ، ارمنی نفاق زواللی آناطولینک مهم
بر پارچه-نی آتشلر ، قانلر ایچنده بر ایش ایدی . بر حالده که
آرتق نهملاری توکه ن استانبولده مقیم سفرای دول معظمه ،
علی الخصوص ایکی شمال دواتق نهملاری بومسئله دن طولای عصابی
تحکمارینی ییلدیزک برج و باروسنه دیکمشلردی . ییلدیزک او وقتکی
حکمدار مطلق ، عبدالحمیدخان ایسه بیق آلتندن بو حالده کولمکله

برابر سفرانك تضيقات متواليه سندن بيقوب اوصانه رق ارمني
 پطريقخانه سنك الك زياده وجودندن شكايه ايلديكي موش خاندانندن
 وسليم پاشا احضاردن موسى بكك بهمه حال حياً در دستيله دربار
 شوكت قراره - محفوظاً - ارسالى بتليس ولايتيله مجاور ولايتلره
 امر وفرمان ايلش ايدى .

بوامر وفرمان جهان مطاع (؟) ولى نعمت بيمت اعظمى نى تلقى
 ايله مباهى اولان ولاه عظام فخامت اتسام حضراتى كوي او دقيقه يه
 قدر داخل دائره مأموريتلرنده شقاوتدن اثر يوق ايمش ده يكي
 برشى اوليورمش كى لطفاً اويانمق زحمتنى اختيار ايله ملاحقانه
 شدتلى شدتلى امرلر ويرمشلر ، معيتلرنده كى آلاى بكليرينى ،
 ضبطيه طايرور وبلوك آنغالرينى قاصوب قاوورمشلر ، عاقبت كرد
 موسى بكى در دسته موفق اولمشلر ايدى . موسى بكى در دست
 ايدن مفرزه هيئتيله منسوب اولديغى ولايت واليسنك بو خدمت
 صادقانه وفدا كارانه لر ينك نزد قدسيت وفد حضرت ولى نعميده
 نه درجه لره قدر مظهر تقدير اولديغنك شاهدى بلا ااهال كنديلرينه
 قوجه بر سلام شاهانه تبليغى اولدى . والى ممنون ، آلاى بكى
 ممنون ، هله پطريقخانه بر مسرت . . .

نهایت بيك قيود، بيك احتياط ، بيك مشكلات ايله موسى
 بك استانبوله كتير بلر ك اوراقى محكمه جنايته ، كندى ده حبس خانه
 عمومينك مرعى الخاطر ذواته مخصوص دائره سنه توديع ايدلى .

استنطاقلر ، استجوابلر ، مواجهلر ، تلطيفلر ، تضيقلر ، نهايت وجاهی وعلنی محاکمه لر ، خلقك ازدحام شديدی آرهنده عدليه قوربدورلرنده رسم کچيدلر ودها صوکره اکثر کونلر قرمزى فسلى ، آلاتورقه ستره لی قورقونج بر طاقم حريرلرله ملاقاتلر ، هیئت حاکمه نك بی طرفلنی موسی بکی اکتساب برائت ایتدیردی .

موسى بك کنديسنه اسناد ايدیلن بتون جنایتلردن ، بتون شقاوتلردن بتون نهب اموالدين ، بتون هتک اباکاردن خاقان زمانك سایه عدل واماينده رسماً برائت ایتمش ايسه ده کردستانه عودتی قطعياً غير جائز اولدينی حالاسفارات اجنیه جه ادا اولنمقده بولنديغدن بر مدت موقته ایچون موسی بکک در سعادتده انقاسی مقرون مساعده کرامت عاده پادشاهی اولمش ايسه ده زرده اقامت ایتدیريله چکی بین الوکلا بر در لوقرارلش دیريله مامش ایدی . برکت ویرسین که قریحه الهام صبیحه عبدالحمید خانى بو امر مهم (؟) ده دخی خارقلر کوستره رک اسکدار متصرفنك [*] حضور شهر یاریلرینه جلبنی فرمان بیوردی ده حل مسئله یه موفق اولدی . یوقسه موسی بکه اوزمانك رجال دولتی روی زمینده یانه جق بر بوله میورلردی .

زواللی متصرف کنديسنك بویله آنسزین حضوره دعوتسندن بر معنی چیقاره میهرق پک زیاده قورقمش اولمغله برابر دقیقه فوت

[*] او وقت اسکدار متصرفی بجرى پاشا ایدی .

ایتمکسزین بیلدیزه قوشمش وبر موجب اراده داخل حضور
اولمش ایدی .

عبدالحمید ایش او طه سنده یالکز بولئیوردی . متصرف کیرنجه
دقتلی دقتلی یوزینه باقوب الارنده ، اوستنده تهلکه لی بر آلت فلان
اولمدیغنی آ کلایه رق کسب اطمئنان ایلدکن صو کره دیدی که :
— پاشا ! سکا اولان اعتماد حالا بردوامدر . بیلیرم که بونی
سوء استعمال ایتزسک . . .

— الی الابد محتاج توجه کز ، کوله کز .

— ممنون اولدم . ضبطیه جه نظارت آلتنده بولنان کرد موسی بی
سکا مسافر ویره جکم . ا کر قاچیریرسهک . . .
— ولی نعمت افندمز . . . طمارلرمده کی بتون قان ،
جسممده کی بتون کیمیکر افندمرک نان ونعمتی ایله وجود بولمشدر .
یوبله برووجوددن خیانت نصل صادر اولور ؟

— سنک صداقتکی پک ای بیلیرم . اونک ایچون بو مهم
ایشی سکا تودیع ایده جکم .

— فرمان افندمزک !

— ضبطیه ناظری حریفی سکا کتیروب تسایم ایده جک ،
سنده خانه کده مسافر ایده جکسک !

— فرمان افندمزک !

— یا قاچارسه ؟ . . .

..... —

— نه ایچون جواب ویرمیورسک ؟

شوکتمائم! کرده موسی بنم همشهرم در . اونک نه قدر جوال،
نه قدر دساس بر آدم اولدیغنی قولکنز پک ای بیایرم . ضبطی براز
مشکلاجه در

— سن ده ای ضابطه مأموری سک دکللی ؟

— اه عمر و شوکت شاهانه کزی مزداد بیورسون . قولکنزده
نه مزیت و ارسه اوده ولی نعمت افندمدن اقتباسه چالشدیغم
نور صداقتدن عبارتدر . یوقسه . .

— هایدی! هایدی یتیشیر : موسی بی آل و محافظه ایت !

— فرمان افندمزنک !



متصرف قان ایچنده حضوردن چیقوبده کندینی ایکنجی
مابینهچینک او طهسنه آتدینی زمان بیوک بر بحران کچیریوردی .
بوکون کندیسنه حقیقه مشکل بروظیفه تودیع ایدلش ایدی .
موسی طورماز ، قاچار . . . بونی پک ای بیلیوردی
عین زمانده پادشاهک تکلیفنی رد ایتکده امکان خارچنده ایدی .
ایشی عنعنه سیله قرین ثانی بک افندی به آچدی ، یاندی ، یاقیلدی
اگر حریف قاچارسه کندیسنک محو اوله جغنی ، بناء علیه
شمیدن مرحمت ایدلسی لازم کله جکنی آ کلاتدی و :

— هم جانم افندم ، ضبطیه ناظری وار ایکن بو وظیفه
نیچون بکا تودیع اولنیور؟

دیگ ایسته دی . قرین بک بردن بره صورتی آصدی :

— پاشا ! پادشاهمزك هرامری عین اصابت ، هر اراده سی
محض کرامتدر ، نصل جسارت ایدیورسک که . . .

جوانی آنجه متصرف آیلدی . تاویل ایچون بیک دره دن
صو کتیردکن ، مخاطبیک حس ضرورینی اوقشایه جق بیک
کلمات طیبه ومدحیه ایله قرین ثانی بکی یوشاندقدن صوکره محل
مأموریتنه عودت ایتمک اوزره سرایدن مفارقت ایتمدی . آرابه سنه
بیز ایکن بلا اختیار مایوس دوداقلرندن شو جمله لر دو کولیوردی :
— یارب ! یا اونک ، یا بنم جانمی آلدده بر آن اول قورتیله لم !

متصرف پاشانک دائره متصرفیه عودتندن ایکی ساعت
صوکره کرد موسی بک ایکی مأمور مخصوص وداعتیه کتیریلوب
متصرفه تسلیم ومقابلنده امضاسیله موشح بر مقبوض علم وخبری
اخذ ایلدی .

متصرف پاشا ایله موسی بک متصرفک چاملیجه جوارزده کی
اقامتگاهنه عزیمت ایلدکلی زمان متصرف یالکیز برشیته دقت
ایدیوردی : موسی بکک حالت روحیه سی مع مافیله ایلاک
ایش اولمق اوزره کنجلاکنده مملکتندن برار کتیردیکی مزرراغک

اوجنه بر قرآن کریم طاقوب موسی بکه اوپدیردی وقاچیه جغه
 دائر کلام اه اوزرینه یمن ایتدیردی . موسی بک بویمینی بلاتردد
 ایفا ایتش اولدیغندن متصرف بر درجه یه قدر مطمئن اولدی .
 چونکه هر هانکی اصیل بر کرد منراغه طاقیلی قرآن کریم اوزرینه
 یمن ایدر سه اوندن خلف ایتسی عدیم الامکان ایدی .

آرهدن کونلر، هفته لر، آپلر کچورودی . موسی بک قوتاغک
 ایچنده، باغچه سنده، حتی ناظر اولدیغی سواقده سر بست کزینیور،
 هوا آلیور، ینه عودت ایدیورودی . حانده او یله بر سکینت
 او یله اوصولاق واردی که بتون خلقتی بیلن متصرف بیله حیرت
 ایدیورودی . بر کون آوه کیده جکندن بختله بر چفته ایله بر بار کیر
 ایسته دی . متصرف تردد ایتدی . او اصرار ایلدی ونهایت
 قاچه جق اولسه بویله وسیله لره لزوم کورمیه جکینی کندینه
 مخصوص بر ذکا وادا ایله آکلاتدی . متصرف پاشاده احتیاطاً
 بیوک مخدومی - که او وقت یاوران شهر یاریدن ایدی - موسی
 بکه ترفیق وایجاب ایدن تعلیماتی اعطا ایلدی . او کون آودن
 آمنأ و سالمأ عودت ایلدکاری کچی بوسید و شکار بر قاج دفعه ده
 تکرر ایتدی .

موسی بک آو آرقه سنده هر کون بار کیر قوشدیر مقله برابر
 آرده سره کندیسنی یوقلامغه موجودیتندن ولی نعمت لرینه معلومات
 ویرمه کان مابین منسوبینی ایله ده دوستلق استحصاله چالیشمقدن

کری طوز میوردی. عادی بر شقی، بر حیدود ظن ایدیان بو آدمده
 اوپله فطری بر ذکا وار ایدی که دکه ذکالر، قارشینده مانوره
 یاپه مازدی. موسی بک بر ایکی آی ایچنده بو دوستقلری پک
 ایلریلتدی، حتی بویکی دوستقلری واسطه سیله بر ایکی دفعه
 عبدالحمیددن اوفاق تفک عطیه لر بیله آلدی. هر عطیه آلدقجه
 پادشاهه ده ایدر، متصرفده بودعالری ایشیده رک بونلردن
 موسی بک استانبوله ایصندیغنه حکم ایله مستریح اولوردی.
 بر کون ینه بومنسوبلردن موقعا اولدقجه مهم بر ذات قوناغه
 کلوب کیزلیجه موسی بکله ایکی ساعت قدر ملاقات ایتدی. بو
 ملاقاتدن خویلانان متصرف باعریضه مخصوصه کیشیتی ییلدیزه
 علاوه مطالعه ایله یازدی. آلدینی جواب شوکت مآب افندیلرینک
 موسی بک قاچیه جغندن امین بولندیغی ایدی.

موسی بک بر کون بر معتاد - فقط یالکز اوله رق - آوه
 کیتمش، اقشامه کله مش ایدی. یاتسو وقتنه طوغری کیفیتدن
 خبردار اولان متصرف یچاره سی بالذات ییلدیزه قوشوب ایشی
 اکلاتدی و بو بایده شرفصا در اوله جق اراده سینه یه انتظار ایلدی.
 بوانتظار بر چاریک ساعت بیله دوام ایلدی. چیقان اراده کسندیسنه
 بر مابینجی واسطه سیله دکل، ترش رو بر تفنکچی ضابطی طرفندن
 تبلیغ اولندی:

— پاشا! با اراده‌سنيه موقوفه‌سکز. . . آرقه‌مدن کليکز!
 ذاتاً بونی موسی بکک قاچ-دیغنی خیر آلدیغی دقیقه‌دن
 اعتباراً بکله‌ین متصرف‌لاقید تفتیکجی‌نی تعقیب‌ایستدی . متصرفی
 مابین دائره‌سنگ آلت قات او طه‌لرندن برینه طیقارق اوستنه
 قیوی قیادیلر ، اوکننده ایکی مساح نوبتجی اقامه ایلدیلر .



[ایکنجی قسم]

کرد موسیٰ نك فرارینك ایرتسی کونی استانبول بربرینه
 کیرمش، بوقاریشقلق بك اوغلی محافلنه قدر سرایت ایتمش ایدی.
 ییلدیزدن اطرافه تلغرافلر، تخریراتلر یاغدی ریلپور، موسیٰ نك
 بیهمه حال دردست واستانبوله اعاده سی صورت قطعیه ده امر
 ایدیلپوردی ... حتی بندکان خاصه و خصوصیه دن برچوقلری
 اطرافه، قونیه، آنقره و جوارینه داغیلپور، مأمورین ملکیه به،
 مأمورین ضابطه به مکافاتلر، تلطیفلر وعد ایدیورلر، عین زمانده
 مأمورینه قارشی ایقاع مشکلات ایله موسیٰ نك دردستی امرینی
 کندی حسابلرینه قید ایچون آنتریقلر چویریورلردی
 بونلر دیدیشه طورسونلر، دیگر طرفدن خاقان ذی حشم موسیٰ نك
 مسئولیت فرارینی یوکله ده جک براوموز آریوردی که اوده
 چوقدن بری تحکیم عاقلانه سندن اورکمه که ، کندیسنه صیق صیق
 صریضه خصوصیه تقدیم ایده مدیکندن طولایی حقننده کی امنیت
 شاهانه مسول اولدینی حالده افکار عمومیه به واوروپا به قارشی
 برچاره عزلی بولنه مامقده اولان صدر زمانك دوش تحملی ایدی .

ایشته بویلانلر، بودوشونجه لر عبدالحمیدخان طرفندن اوافق بر
همتله موقع فعله قونمق ایچون بندکان خاصه طرفلرندن اعمال فکره،
اتخاذ تدابیر اولنیور، ولی نعمت بمنت اعظمینک انفاذ آمالی یولنده
هر بنده خاص علی قدر الاستطاعه چالیشیوردی .

اسکدار متصرفنک توقیفندن ایکی کون صوکره عبدالحمیده
بر ایکی مهم ژورنال تقدیم ایدلدی . بسببلی بونلردن بری، بلکه
ایکیسی موسی بکک فرارینه متعلق اوله جق که آن تقدیمی متعاقب
خاقان زمان کنیش بر نفس آله رق متصرفنک حضورینه کتیرلسنی
و کندیسنی اونکله یالکنز بر اقلرینی فرمان بیوردی .

پادشاه ایله متصرف مابین دائره سنده کی مقام سلطنتنده یالکنز
قالان عبدالحمید سرت بر چهره ایله متصرفی بالذات استجوابه
باشلادی :

— سکا اولان اعتمادیمی سوء استعمال ایده جککی هیچ مأمول
ایتمزدم پاشا !

— افندمن !

— انکاره لزوم یوق ! سن خائن بر صدر اعظمک خاطری
ایچون موسی نی قاچیر ارق سفارتخانه لری بکا هجوم ایتدیردک . . .
اویله دکلی ؟

متصرف شاشیردی بویولده بر استجوابه معروض
قاله جغنی قطعاً خاطرینه کتیرمه مش ایدی . نه یاپلی ، یالانمی

سوئلی ایدی ؟ ولی نعمتنک قورمقده اولدینی دوزاغه اولاد
 صدراعظمک دوشورلمکده اولدینی، سوکردهده کیم بیلیر کیملرک
 دوشورلمک ایستنیله جکنی برر برر سرعت برقیه ایله ذهنندن
 کچیره رک چابوق برقرار ویردی : خیر ، بویله برشی یوق ایدی ،
 یالان سوئلیله میله جکدی . . .

پادشاهنه ، ولی نعمتنه صدقاتی هر درلو فدا کارلنی اختیاره
 کندینی مجبور ایتمکله برابر خدمات صداقتکارانه سنی قباحتر
 کیمسه لره افترایه قدر تشمیل ایتمکی بر درلو وجدانی قبول
 ایتموردی . دهها طوضری افاده ایله متصرف ، عبد الحمیده پک
 چوق سنه لر خدمت ایتمکله برابر فضائل خلقیه سندن بر چوغنی
 هنوز محافظه ایلمش ایدی . بردن بره حضور پادشاهیده ا کمش
 اولدینی باشنی قالدیردی ، پادشاهنک دقتلی دقتلی کوزلرینه باقه رق
 جواب ویردی :

— خیر افندمن ! او یله برشی اولدی ؟

— انکار ایدیورسک او یله می !

— افندمن . . . حضور سنیه کزده بر بشته سی اوافق
 بر یالان ارتکاب ایتمسه جد اعلا کزک مبارک باشنه یمین ایدرم که
 در حال قفاسنی قوپازیرم . . . زرده قالدی که بوجناتی قولکنز ،
 بالذات ارتکاب ایدیم . . .

— سن اولجه بویله ایدک ، بنده بویله بیلیردم ، فقط

شمدی ؟ . . .

— شهریارم ، قولکنز عین بنده کز در . کرک اخلاقنده ،
کرک مشوارنده ذره قدر تبدل یوقدر !

— پک اعلا ، موسی نک فرارندن اوچ کون اول نچون
باب عالی به کیدوب صبر اعظمه خصوصی ملاقات ایتدک ،
سویله بقالم ! . . .

— افندمز صدر اعظمه ملاقاتم طوضریدر ، فقط بو ملاقاتده
موسی بک سوزی هیج کچمه مشدر . هر وقت اولدینی کبی صرف
مملکتک امور انضباطیه سنه دائر بعض معروضاتده بولنق ایسته دم .

— ای ! بو اعتراف یولنده . . . چونکه موسی نک فرار
وعدم فراری ده انضباط مملکتده تعلق ایدر ، بو اعترافکله یالان
سویله مک ایسته دیکنی آکلایورم ، فقط تأویلی براق !

متصرف آرتق بیتمش ایدی . کمال صفوت و سادگی ایله حقیقتی
سویله ایستدیک حانده « تأویلی براق ! » امریله افاده سی تأویل
اولنیوردی . . . اگر کندیسنی استجواب ایدن ذات عادی بر
مستنطق ، حتی بیوکجه بر مابینچی فلان بیله اولسه ایدی ، در حال
ضرر تلاغنه آتیه جق ، اونی پاره لیه جق ، بو غاجق ایدی . . .
چه سودکه قارشیدسنده کی آدم اونلردن دکل ایدی . آلنندن دامله
دامله آقان ترلری سیلمک ایچون النی جینه کوتورمک احتمالی
اولدیغندن ترک جریاتی کندینه براقش ، داملایان دانه لردن
فوتینلرینک اوزری ایصلانمش ایدی . مع مافیله یینه جواب
وبرمک لازمدی . دیدی که :

— افندمز . . . اوغور هابونلرنده دکل کندی باشمی،
بتون عائلهم افرادینی فدایه هر آن حاضر م . . . یالکوز . . .
— یتشیر !
بونک اوزرینه خاقان مخلوع قالین سسیله قیویه طوغری :
« کل ! » نداسیله باغردی . بودغه ایجری کیرن تفتکچی باشی
متصرفی آلارق تکرار معهود او طایه طیقادی .

بوندن صکره کی استجوابلر صره سیله برقاچ مایینچی طرفندن
اجرا ایدلی . فقط متصرف عین صورت ، عین افاده ی تکرار
ایتدی :

— موسی نک فرارنده باب عالینک هیچ دخلی یوقدر .
اولجه کندسیله خصوصی ملاقاتلریا پان مابین هایون منسوبیندن
فلان و فلان ذاتلرک بوفرار حقنده دها زیاده معلوماتلری اولوق
لازم کایر ! . . . اونلردن صوریکز ! . . .
زورلی برمایینچی برکون متصرفی ایچه زورلادی . زواللی
آرتق عصیان ایدیوردی . دیدی که :

— بن سزه برشی س— ویلیه می می ؟ بن پادشاهمک نزدنده کی
موقعی ، طوغری یاغمک ، صداقتک مکفاتی اولوق قازاندم .
برشقی بی الیمه ویریکز ، پارچه پارچه ایدیم ، بر عرض دشمنی
تسایم ایدیکز ، باجقلرندن ایکی یه آیره می ، پادشاهمه ، مقام
خلافته اهانت ایتمک ایسته ین برینی کوستریکز ، ائلرینی دیشلمله

قویاره‌یم ، فقط . . . فقط بکا افترا ، یالان تکلیف ایتمیکز ،
چونکہ یاپہ‌مام ! . . .

— فقط پاشادوشونکز ، افندم‌نک توجہاتی نہ قدرقیمتدار
اولدیفنی دوشونیکز . . . سز بو عنادیکز ، بو انکاریکزلہ
او توجہاتی غائب ایدیورسکز . . . ہم افندم ، سویلنمسی
سزہ تکلیف ایدیان شی براسناد ، برافترا دکل ، عین حقیقت ،
عین واقعہ در . سزک مصرانہ انکاریکز ولی نعمت افندمزہ
افترا اسنادی دیمک دکلیدر ؟

— یوووق . . . ایشی مغالطہ یہ بوغمہ یہ لم ، بن پادشامہ
قارشی هیچ بر زمان اولہ کستاخلقده بولنام و بولندم . بن
طوغری بی سویلیورم . . . موسی ، بنم آکلایشمہ کورہ ،
فکر فراری مابین‌هایون منسوبلرندن (. . .) و (. . .) [۱]
ذاتلرہ پیدای انسیتدن و اونلرہ خصوصی ملاقاتلر اجراسندن
و وکرہ ذہنہ یرلشداش و او جسارتلہ قاجشدر . بن بتون
بونلرک اولہ جغنی قبل‌الوقوع حس ایدرک باعریضہ خصوصہ
دفعاتلہ عقبہ‌شاهانہ یہ عرض و اعلام ایلدم . شمدی آکلایورم کہ
عریضہ لرم تقدیم ایدلمہ مش ، یاخود تقدیم ایدلمش ایسہ‌ده
اووقونامشدر . . .

[۱] بوذاتلرک الیوم برحیات بولملری محتمل اولدیفندن اسملرینی
ذکرہ لزوم کورمدم .

— پاشا ینه تجاوزه باشلا یورسکیز !

— خیر، کندیمی مدافعه ایدیورم ایسترسه کز

سکوت ایدیم !

بو استنطاق ده بوراده کسیلدی . مایین هایونک بتون جوال

ذکالری ، دهالری متصرفه قارشی استمهال ایدلمش ، فقط هیچ بر

ثمره الده ایدیله مه مش ایدی .

*
*

تام بوسره ده خاقان سابقک امدادینه موسی بکک اسکیشهر

یولنده توقیف ایدلدیکی خبری یتشدی . ویریلان امر اوزرینه

سرعت ممکنه ایله حریفی استمانبوله کتیردیلر . متصرفک

توقیفنک بشنجی کونی کندیسنه حضور پادشاهیده کرد موسی

ایله مواجهه ایدیله جکی اخبار وتبلیغ اولندی . متصرف بونی

ایشیدنجه کنیش بر نفس آلدی . چونکه موسی بر کرد بکی ،

همده اصیل بر آدم ایدی . البته ارتکاب کذب ایتیمه جکدی .

برکیحه یاتسودن سوکره مایینجیلردن بری واسطه سیله متصرف

تکرار حضور هایونه چیقارلدی . پاشا داخل حضور اولورکن

اوطه ده ایلك نظر دقتنه چاربان شی کرد موسی بکک وجودی

ایدی . زواللی پاشا حریفک دردست ایدلمش اولسنه قلاباً بک

سویندی ، چونکه آرتق حقیقت میدانه چیقاجق ، کندیسیده

وعذابدن قورتیله جق ایدی . ایچری کیرر کیرمن خاقان سابق

کنندیسنه توجیه خطابه :

— پاشا سنک یالان سویلدیکنی موسی بکده اعتراف
اعتراف ایدیور . . .

دیدیی ، بر کرد بکنک اصلا یالان سویلبه جکنه قائل اولان
متصرف مستریح و مطمئن :

— افدمز . . . موسی بک ، علی الخصوص حضور
هایونلرنده یالان سویله من . . .

جوابی ویردی بودفعه عبدالحمید موسی بکه توجیه خطاب
ایتدی :

— سنک فرار کده صدر اعظمک دخل و تشویقی اولدیغی
متصرف انکار ایدیور . سویله باقییم ، کنندیسنک معلومانی
یوقی ایدی ؟

— افدمز . او مساعده لی داورانسه بن نصل قاجاردم ؟ .
متصرف دایانه مدی ، آتیلدی :

— ولی نعمتم ، اعتراف قصور ایده جکم . . . بونک اللرینه
آیاقلرینه برر کلچه اور مدیغمه بیوک خطا ایتمشم . . . فقط
نه یا بهیم که او یله یا پمقلغمه دائر بر اراده سینه کز یوق ایدی . بو
یالانجی حریف یالکنز ، اوت یالکنز افدمزک مساعده لطفکارانه سندن
استفاده ایتمشدر .

بوصوک جمله عبدالحمیدی تتره تدی ، قیپ قرمزی اولدی ،
کمال حدت و شدتله :

— پاشا ! بنده سنی آدم ظن ایدردم . چیق طیشاری !

متصرف مقهور و منفورینه تک پنجره لی اوطه سنه ایصال
 ایدلدی . آرتق کندیسندن هیچ برشی صورولمور، هیچ راحتسز
 ایدلموردی . مواجهدن اول بعض مابین منسوبینی، آره لرنده کی
 اسکی حقوقه رعایه آره صره حال و خاطرینی استفسار ایدیورلر ،
 سیغاره ، قهوه کبی شیر کوندره رک پاشانک تطیب خاطرینه همت
 ایدیورلردی . بودور بین آدملر پاشانک برکون کلوبینه مظهر
 توجه پادشاهی اوله بیله جکئی دوشونورلر ، آکا کوره تدارکلی
 داورانورلردی . فقط : « چیق طیشاری » تعبیرله حضوردن
 قوغولوبده اسکی اوطه سنه ارجاع ایدلداکن صوکره ، آرتق
 احاده توجهم احتمالی اولمدیغنه حکم ایدرک کیمسه یانسه اوغرامق
 دکل ، اوطه سنک اوکندن بیله کچموردی .

ینه بواننده پارس غرنه لرندن بر ایکیسی - اوزمان آناتولی
 شرقی آفتی صاییلان کرد موسی نک فرارینی (غران وزیر . پاشا) نک
 احضار ایلش اولدیغنی بالذات موسی نک حضورهایونده اعتراف
 ایتدیکنی یازیورلر . بر ایکی کون صوکرده صدر اعظمک بر
 ولایت والیدی ایله استانبولدن تبعید ، کرد موسی نک مدینه
 منوره ده اقامته مأمور ایدلمک صورتیله نفی واجلا واسکدار
 متصرفنکده آرنانودلقدده بر متصرفاغه - فقط محفوظاً -
 اعزام قلندیغنی نشر ایدیورلردی . استانبول جرائدی وافواه
 اهالی ایسه کماکان بر صمت و سکوت !



غریب بر سوء قصد

« عبدالحمیدك قیغولری » سرنامة عمومسی التندہ شواثرک
نشرینی قرارلش۔ دیرلدیغم دقیقه۔ دن اعتباراً بعضاً دفتر
خاطراتی ، بعضاً آده خاطرات احبایی قورجالایه رق موضوع
بولمغه چالیشیوردم . بر کیجه عین امل ایله اوراق پریشانی
قاریشیدیررکن اودای قدیمه دن بزاتک تقریباً اوتوز سنه اول
بکا اکلادتینی بروقعہ حقیقیه یی درخاطر ایتدیره جک اوفاجق
برنوط کوزیمه ایلیشدی . مال بولمش مغربی یه دوندم . او وقتک
مخائف مطبوعاتندن ، اذان استطلاعندن پک اوزاق قالان بو
حادثه عجیبه نک ایزی احتمال که برکون بتون نام ونشانیه غائب
اولور ، منسیاته قاریشیر مطالعه سیله انظار عبرته وضع ایلمکی
بیوک برارزو ایله تنسیب ایلدم .

وقعه تقریباً اوتوز سنه قدر اول بر جمعه کونی جریان
ایدیور. سلامق رسم عال‌العالی، انشا آتی هنوز ا کمال ایدیلن
« حمیدیه » جامع نورلامعنده اجرا بیوریله‌جق، شهریار کروی
صفات(؟) کردونه شوکت نمونه شهریار یه شرفبخش عز و اجلال
اولدقلری جالده جامع فیض لامع مذ کوره شرف مواصامت
ایله جک ایدی . پادشاه زمانک بو پک مهم خروج و دخولنک
بلا حادثه وقوعی تأمین ایچون سر عسکرندن بدأ ایله دو من
نفرینه وارنجه یه قدر اتخاذ تدابیرده قصور ایتیمور ، فرقه لرله
عسا کر مسلحه ، طابور لرله جواسیس معینه ایفای حسن وظیفه
(!) یه چالیشوردی . کوکسلی مرصع نشانلرله طولو مشیرلر ،
فریق لر ، لوالر ، قولاری پیرلتیلی قوردونلرله مزین یاورلر ،
سلاحشورلر وقت ظهر دن بر ساعت اولندن بدأ ایله ییلدیز
جوارنده آت اویتادییورلر . اطراف و اکنافی ترصد و تفتیش
ایدیورلردی .

او زمانک لایتغیر بردستورینه تبعاً بشکطاش محافظی ده
ییلدیز اطرافنده صوک دورینی یاپوب شهریارک بلا احتراز سرای
همایوندن چیقهبیله جگنی کمال اطمئنان ایله بالواسطه عرض
ایدوبده ینه بالواسطه مظهر التفات جهاندرحات حضرت ولی
نعمی اولدقدن صوکره سرای ایله جامع شریف آره سنده بیوک

بر صمت و سکون اجرای حکمه باشلادی . ارتق هرکس ،
وظیفه لی وظیفه سز هر شخص کوزلرینی پادشاهک کردونه
هایونیه چیقاجنی بیوک سلطنت قبوسنه دیکمش ، قدوم شاه-
نه نی بکلیوردی . موزیقه آماده ترنم ، دیزیلرله موجود عسا کر
مهای سلام و احترام . تماشای دیدار ساطع الانوار مقصد
صادقانه سیله طوپلانان خلق ده پر خلجان منتظر یوقاری
باشدن آجی بر بوری سسی اورته لغی چینلادی . بتون منتظرین
پادشاهک چیقمق اوزره بولندیغنی بورینک اخطارندن اکللا-
یهرق انظار دقتلرینی بیوک قبو طرفنه توجیه ایتدیلر . عین
زمانده او محتشم قپونک مذهب قنادلری محورلری اوزرنده اغیر
اغیر دونه رک آچیلدی . ارتق هیچ شبهه یوقایدی که شوکت مآب
کلیوردی . حمیدیه جامع شریفنک مناره سنده کی مؤذن اذان
محمدی اوقومق ایچون الی قولاغنده حرکت شهر یاری نی بکلیوردی .
حرکت هایونه اشارت اولان بورینک عکس صداسی اطراف
ونواحی ده هنوز ایگله مکده ایکن مؤذنک : « ادا کبر! » نداسی ده
سامعه منتظرینی اوقشامغه باشلادی . تام بو ائناده بیوک قبویه
یقین بر موقعه بولنان امرای خاصه دن اوچ درت ذات قبویه
طوغری قوشوشدیلر . بو قوشوشمه پک آنی و فوق الطیعه
وقوع بولدیغنی جهتله آز چوق ییلدیز احوالنه واقف اولانلرک
نظر دقتلرینی جلب ایتدی ایسه ده پادشاهک تشریف هایونلری

پك تقرب ایتمش اولدیغی بر زمانده ترك موقع ایلمری جائز اولهمیه جغندن اوزاقدن نکران اولمغله اکتفا ایلدیلر .

بیوک قپویه طوغری وقوع بولان قوشوشمه حرکتندن برایکی دقیقه سوکرده شهریار زمان ، اعنی به عبدالحمید خان باعز واجلال عرض جمال بی مثال ایلدیلر . هرکس ینه وظیفه سی باشنه عودت ایتمش ، پادشاهک آرابه سنک تکرلکنک جامع قپوسنه قدر قاج دفعه دوندیکنه وارنجهیه قدر دقت ایدرک کوزلریله آرابه بی تعقیب ایتمکده بولنمش ایدی . خاقان بی امتنان کمال حشم وداراتله محفل هایونه قدمزن هیبت و خشیت اولونجه قرناسندن (♦♦♦) بکله اثوابچیسینی یاننه تقریبله برشیلر صورتی . اونلرده اولدقجه اوزون ومفصل جوابلر اعطا ایلدیلر . کری طرفده وقفه کیراحترام اولان وکلا ، وزرا ، مشیران و بندکان بواستیضاح وایضا حلدن برشی آ کلاویه مامقله برابر ایشک قو- شوشمه حادثه سنه تعلقی اولدیغنی حس ایلدیلر . مابینجی ایله اثوابچینک بعض ارادات خفیه تلقیسیله انفکا کلرندن سوکره عبدالحمید براز مستریح اوله رق نمازه طوردی .

♦

♦♦

شمدی حادثه بی ابضاح ایده لم : ولی نعمت بیمنت عالمیان ، نوردیده اسلامیان اولدیغنده بتون مطبوعات عثمانیه او وقت متفق بولنان خلیفه عالی جاهک ازاله وجودی (قره یانوپولو)

اسمنده بر یونانی ، یاخود بر رومانیالی ، دیگر بر روایتہ کورہدہ بر قرہ طاغلی طرفندن - هر نه سبیه مبنی ایسه - تصمیم و فعل قتلکده عادی بر قما ایله اجراسی تنسیب اولنہرق مسفور مندبور ، پادشاهک بیوک تحت قبوسندن چیقاجغنی ظن ایدرک او قپویه یاقلاشمش و آچیلیمسنی متعاقب نوتجیلری آئنده کی قما ایله ضرب و جرح ، حتی برینی ده شهید ایلدکن صوکره هر کسک بهت و حیرتندن بالاستفاده ایجری دالمش ایدی . حال بوکه شهریار زمان هر وقت رعایت ایتدیکی احتیاطکاره لغه بو کونده اتباع ایدرک یولنی دکیشدیرمش و تام حریفک هجومی آننده آرابه سی قولتوق قبودن چیقمق اوزره بولنمش ایدی . بو وجهله و صون صمدانی ایله مصون و محفوظ قالان شهریار یوقاری ده ذکر ایتدی کمز اوزره امناً و سالماً جامع شریفه مواصلت ایلمش ایدی .

اسمنک قره یانوپولو اولدینی بالآخره اکلاشیلان بوشخص مجهول و مجنون ارقه سندن یتیشن بر ایکی بنده صادق وانلری تعقیب ایدن عسا کر خاصه طرفندن صوپا و سونکولرله مجروحاً یره سرلدکن صوکره قپولرک محافظه سنه مأمور بر ضبطیه بیکباشیمی طرفندن ده آئنده کی قما ایله جیننده بولنان بعض اوراق آلمش ، مجروح متجاسر برای تداوی واستجواب سرایک ایچ دائره لرندن برینه ایصال اولنمش ایدی .

سلاماق رسم عالیسی مسکی الحتام اولوبده پادشاه زمان
 بندگانی ، بتون خلقی ، حتی معتبران اجابی التفات وتلطیفات
 علی الدرجات جهانبان اعظیملریله وایه دار ایده ایده سرای
 هایونه عودت ایدنجه قدمای مشیراندن ایکی ، قرنادن بر ،
 تفنکچی بکارندن بر ، ضبطیه امراسندن بر ذاتدن مرکب همان
 بردیوان حرب تشکیلی ایله حریفک استجوابی وتظاهارایده جک
 نتیجه یه کوره حقنده لاحق اوله جق قرارک لاجل التصدیق
 عتبه سینه لرینه عرضنی امر وفرمان بیوردیلر . عین زمانده
 او عصرک مطبوعات مدیری ده مابینه چاغیریله رق : « افدمزه
 قارشی بر سوء قصد وقوعی بعض خائشر طرفندن اشاعه ایدمک
 ایسته نیلیور ایسه ده قطعاً اصل واساسی اولمدیغندن مطبوعات
 طرفندن بویله برشایعه نک - ولوایهام و اشارت صورتیله اولسون -
 یازلمسی غضب شاهانه نی موجب اوله جنی » صورت محرمانه ده
 تبلیغ اولنمش ، مدیرک آریجه عطیه سینه ایله بروجه پیشین
 تسریر بیورلمش ایدی .

بر منظوق امر وفرمان جهان مطاع (!) حضرت پادشاهی
 ییلدیزده دائره مخصوصه سنده تشکل ایدن دیوان حرب ، ذوات
 معلومه دن مرکب اولدینی حالد کیهلی وکوندوزلی بالاجتماع
 ولی نعمت اعظمه سوء قصده مجاسرت ایدن لعینک امر

استنطاق واستجوابنه صرف ماحصل غیرت ایدیور ایدیسه ده
 ممکن دکل ، حریفه برشی اعتراف ایتدیره میوردی. استنطاقك
 درجه سی بردلو ایلك كونك مرتبه سنی كچه میوردی. حریف
 اولوم اللهك امری ، حرف واحد ایلریله میوردی. مشیراندن
 بری پك زیاده حدتلندی ، بو ملعونی بالذات استجواب ایده.
 جكم دیدی واویله یاپدی. دیوان حربك منعقد اولدیغی اوطه نك
 یانی باشنده کی دار بر یرده مجروحاً موقوف بوانان متجاسر، رئیس
 پاشا حضر تلرینك امری ایله دیوان حرب حضورینه کتیر یله رك
 بالذات پاشا طرفندن شو وجهله استجوابنه باشلاندى :

— اسمكك قره یانوپولو اولدیغنی آکلادق . . . هانکی

تبعه دنسك ؟

— بیلمیورم !

— نه دیمك ، بر آدم هانکی دوات تابعیتنده بولندیغنی

بیلزمی ؟

— بن بیللم !

— پکی ! اوجهت طورسون ، نیچون بوسوء قصده تشبث

ایتدك ؟

— بن ایتدم !

— فصل ایتدك ؟ أئنده قباله سرای هایون قپوسی ایچنده

دردست ایدلك . بو ، انكار ایدیلر شیمی ؟

— بن انکار ایتیمورم

— نه یاییورسک ؟

— هیچ برشی یایمورم !

مشیر پاشا او طور دینی قولتوق صندالیه سندن بتون حدت

و شدتله فیرلادی و :

— بونه مسخره لق نه جرأت ؟ سن عادتاً بزمه اکنیورسک !

دییه باغیردی . حریف ، بالعکس ساکن و معتدل جواب

ویردی :

— بن اکنمیورم . سز صوریورسکز ، بن جواب

ویریورم . اکر ویردیکم جوابلر ایشیکزه کلیورسه او ، بکا

عاند برشی دکل . بن سوؤاللریکزی هیچ جوابسز براقیورمییم ؟

بودفعه پاشاده دکل ، بتون هیئتده صبر و طاقت قلامش

ایدی . حریفی دیشلریله بیه جکلر ایتمش کبی دندان نی انصافلرینی

غجیرداتمغه باشلادیلر . مشیر پاشا آرتق بالذات استجوابدن واز

کچمش ، وظیفه استتطاتی اعضادن ضبطیه بیکباشیسنه ترک

ایتمش ایدی .

بیکباشی — قره یانوپولو ! بکباق ! صوراجم شیلره ایی

دقت ایتمش . سن هر هفته سلامغه کلیرمی ایدک ؟

— خیر . برنجی دفعه کلدیم .

— سنی کیم کوندردی ؟

— وجدانم !

— بورایه یالکزمی کلدک ؟

— اوت !

— طوغری سویله میورسک ؟

— بیلدیکمی سویلورم !

بیکباشی ده آنجق بو نتیجه یی استحصال ایده بیلدی و آرتق استتقاقک دوامنده بر فائده مأمول اولمدیغنه دیوان حرب هیئت عمومیه سنجه قرار ویریلهرک حریف سوء قصد فعلنک فاعلی اولق اوزره اتهام و بر موجب قانون اعدامنه حکم اولندی . کیفیت عریض و عمیق یازیلوب چیزلش و غایت مفصل بر مضبطه ایله اسباب موجبه ورقه سی تنظیم ایدیلوب بلا افاتنه وقت عرض عتبه علیا قلمش ، موجبنجه اراده سنیه اقران ایتمش ایدی .



دیوان حرب هیئتک وظیفه مودوعه مهمه لرینی آرزوی ملوکانه وجهله حسن ایفایه موفق اولملری نزدالهام وفد شهریاریده پک زیاده محظوظیتی موجب اوله رق اعضای موجوده نک کافه سی نشان ذیش-انلر ، ترفیع رتبیلر ، عطایای سنیه لر ایله تلطیف و تسریر بیورلش ، ایرتسی کیجده عین هیئتک حضوریه

قره یانوپولونک ییلدیز میداننده صلباً اعدامی مقتضای اراده مهابت عاده حضرت پادشاهیدن بولنمش ایدی .

هیئت بواراده سینه بی ده انفاذ امنیه صادقانه سیله ایرتسی کیجه اولجه طوپلاندقلری اوطه ده اجتماع ایله رئیس طرفدن کیفیت صلب حقنده اتخاذ تدابیر اولندیغی صروده اعضادن بری محکومک بولندیغی اتصالنده کی اوطه یه ناظر پنجره دن باشنی اوزادوب ایچریسنی کورمک ، حریفک صوک دقیقه لرینی نصل کچیردیکنی آکلامق ایسته مش ایسه ده باشنی اوزاتمقله برابر چکمی بر اولمش ، آغزندن برندای حیرت فی رلامشدر . بو حرکت آ نیه هیئت محترمه اعضاسنک انظار دقتنی جلب ایدرک نه اولدیغی استفسار ایتمشلر ایسه ده دوچار حیرت اولان ذات ایضاحات ویرمکه لزوم کورمه دن رفقاسنی پنجره دن باقغه دعوت ایتمش و جمله سی پنجره یه قوشه رق برر دفعه عطف انظاردن صوکره بردن بره چکلمشدر .

مکر بر طرفدن محکومک صلی ایچون سهپالر ، ایی چکه جک آدملر تهته و تحری اولنورکن دیکر طرفدن محکومک بولندیغی اوطه یه ائنده سیوری صاپلی بریچاق اولدیغی حالده کیرن غایت صادق بر تفکجی ائنده کی آلت قاطعه بی حریفک غر تلاغنه کرات ایله صوقوب چیقاره رق جزای سزاسنی (!) ویرمکه بولنمش ایدی .

افراد عائله مك تأمین سلامتی ایچون اوراده کی ایشلمی تسویه
ایتدکن صوکره استانبوله کله جکمی، مصارف، خرچراه فلان
نامه هیچ برشی ایسته مدیکمی سویله رک حرینی دفع ایتدم .
ایکی بچق ای صوکره کافی السابق نظامی دائره سنده ویزه ایدلمش
پساوانمی حامل اوله رق عودت ایلدیکم و سرکه جی استاسیوننده
بر بلوک قدر تفنکجی، براوقدرده اجناس مختلفه دن خفیه گروهی
طرفلرندن حسن استقبال ایدیلهرک کمال دبددبه ایله ییلدیزه ایصال
اولندیغم صروده ایلك ملاقات ایتدیکم بندکان صدق نشان
عبدالمجید خانیدن برذات شیطنت صفات سرایه دخولم برنجی
دفعه اولمق اعتباریله دوچار اولدیغم وله و حیرتدن بالاستفاده
ماصه سنک اوزرنده بواندیردیغی بر کاغدی امضالاتمق اوزره
بکا طوغری اوزاتدی . باقدم ، بنم بلغارستاندن عودتم مصارفی
اولمق اوزره بر آلائی حسابلر مرقم ایدی . یکوننه دقت ایتدم :
۵۸۷ لیرای عثمانی، یتمش آلتی سانتیم !! بن ایسه قونوانسیونل
ترهنک تحته دوشمه لی اوچنجی قلاس واغوننده و بر بیلت
اجرتی اولان ایکی لیرا کسورغروش ، بالاستقراض تدارک ایلدیکم
پاره دن ویرلمک شرطیله تترهیه تترهیه یوجلیق ایتمش ایدم . بو
حسابک زیرنده شو عباره وارایدی :


« بالاده مفرداتی مرقم مبالغی تماماً اخذ و قبض ایلدم . »

امضا


آرتق بوکا ديه جك يوق ایدی . مع مافیه ینه بر بجران عصبی
بتون وجودیمه استیلا ایلدی . کندیمی ضبط ایده مدم ، فیزان
چوللری ، بودروم قلعه لری ، پیاس منقاسی کوزلریمک اوکنده
بررکلزار کچی تجلی ایتدی . بلا اختیار :

— سز بو دنائنی بنم ارتکاب ایده جگمی ظن و تخمین
ایدیورسه کنز ، پک بیوک احمقلق ایدیورسکنز ! . . .
ایشته عزیزم ، بو صداقتسنزلك (!) بنم تام اون ددرت سنه
آسیا چوللرنده صحرا نوردلکمه باعث اولدی . «









3 1761 07145887 1

Sāmi, Ebū 's-Süreyyā
'Abdülhamīdīn kayguları

DR

571

.5

S34